

Paulsh ROME kuhtée akchiwakíialaxuahcheesh ala kuss baawaalaátdeehcheesh hinné koók.

“Shóotaachi?” hek Paulsh.

1 Paul huum Christ Jesus akbaahilakúuash bíik. Akbaatatdía kon bacheeiiaxpíluupuum ala chilakappéesh ko bii hawáhchek. Deéla kúh bii páttak bilaxpáake bii chiweéhchewiak Baleiichiweeítcheesh balee héelass húuhcheesh. ²Baa baapiísko Jesus awé it kuss huusséesh Akbaatatdía ko Baleiichiweeítcheesh baa éhchehchewiam baapanmasshipúua Akbaatatdía ammaaihchiláakuuhcheesh Baawaalaáchim Baaxpéesh kúh awúuan baalaáchihchek. ³Hinna Baleiichiweeítche beesh Akbaatatdía Baxxiilaatúuash Jesus Christ is baaaliichiwéesh koók. Jesus hinna awé áakeen bishéesh Bacheeítchikaashim David huuash is ílannee ko hawák. ⁴Heeht Akbaatatdía dáakbachee bale shée koon kaka chiléhkaak an baatcháachkaashe ii díam dáakbachee kóosh baaxpaakaáshim kal ii xíassahchek. ⁵Heem Jesus Christ bii kulustawakuúm Akbaatatdía bii páttak bacheeiiaxpíluupeesh ko bii héeleen dúusaak ii bii anníhiissaahaa bii daásdeeak Jews ak kootássee ahóom dáashe báaxxiolak Jesus is baa al iichiweeítche kaláttuulak kúh al ilíiash díaluulak ⁶Rome ak koolé díluh Jesus Christ kon dii chilakappák dii aáulak hiliachik.

⁷Heem Rome kuhtaa bilaxpáakeesh hinna baawaalaácheesh akchiwakíia díilun díiluss déewahchek. Akbaatatdíash dii íchissak dii iláak is bilaxpáake ko dii achíhchewiak.

Hilísh Baksáaush Akbaatatdía dak Baxxiilaatúua Jesus Christ dii daásdealakuuak an dii bilaxpáakuuash baakoon ítche dii dahkúhcheih.

Paulsh Akbaatatdía kuss chiwakáak “Ahóoh.” hek.

⁸An baa dáhkalattuuash ii iláaum awé kootáa ii dii asíituuk. Heem hinna baawaalaácheesh bassáachiahte bas Akbaatatdía kusséesh “Ahóoh.” baawalakuuk. Hinna an díawee Jesus Christ kon bii koochéehchek. ⁹Hinna ammaa ala sheewée koottáhiluuk. Heem Akbaatatdía éhchek. Bahchiwakíit kúkkán dii bahkalaaxtássaailuk. Akbaatatdía baa díawaawakak dáakbachee is baaaliichiwee baleiichiweeítcheesh bíh aláxalaa déewahcheesh koówahchek. ¹⁰Haak kala chii hinné kúh kuss baakaalík. “Eehkuhtee kuss baaléewiawee kootáhkaawakuh.” baaik. Aaláa kootíhmaachik. ¹¹Ii dii awákaa boówísshé dii awáxpak balíilichkissak Akbaatatdía bii chúuss baa hilák ii dii kuxsúulak ii an dáhkalattuuá kannaa dalásatchutuulak baliachik. ¹²Ta xuh itchihk díiluss ashbínmaanmiawuum an bahkaláttuuash ii bat shéess bíichiweewook. Kalako ii an bat bahkuxsúua koók. ¹³Deéla hinné élahkuulak baliachkaáshik. Bakúpkaateen kal ahú aa éehkuss baaléewiawaak baawéet kalakoon bípbisak baaíkeet bii daxtaachík. Eehkussee baaléewiawaak dii héeluaa hám Jews ak kootássee ihée hám Jesus kaláttuulak baliachik. ¹⁴Haak Jews ak kootássee xaxúa kusseé baleiichiweeítcheesh Akbaatatdía bii chiweéhchek Greek kootá dak ak kootássaa dak ak baa chimmák ii baa éhche dak ak kootássaa dak. ¹⁵Kal íwahkootam ii biiwaachíssaak eek Rome kuhtée Baleiichiweeítcheesh bíh dii iikukkúwahchewiawuuk.

Baleiichiweeítcheesh kalako ii baa baatcháache kootúuk.

¹⁶Baleiichiweeítcheesh dak an baatcháache dak ii bilaxpáakuum Christ kaláttuuash Akbaatatdía kon ii iléihmaachik. Koochihkáa Jews kootéesh baleiichiweeítche iikukkák díoosh Akbaatatdía kon iléek. Kalakoon Jews ak kootásseesh kúh iléek. Hinna íwahkootéesh

Baleiichiweeítcheesh bulusshíchissaak Christ ammaa an díash ii biichiweéwiik. ¹⁷Heem hinna Baleiichiweeítcheesh ii Akbaatatdía ii baa xíassaahchek an balee íkee an balee annawéesh an baa bahkaláttuuwasseesh kukaa aa al uhpé aawiíosh. Iwak ii koochéesh Christ an bahkaláttuuash kuttáchik. Baawaalaáchim Baaxpéesh awúuan an baalaáttuuash íwak koottáahilim ii éwahkuuk. Hilíashiiok. “Bilaxpáakeem bii kalátchelak annámmahkaak hilaa bilaxpáaktaahilak an bilaxpáake ii baa koochihtíihmaachik.” huuk.

**Akbaatatdía an balee íkee biixaxúa
balee ak baa kxawíihilik.**

¹⁸Jews kootássuum baa kaláttuuleetak batshúoosh Akbaatatdía ala koottáahileesh éhchewiassaak hawéese éhchehchewiassuuk. Kalako ii iixaxúa baa kxawíia díailuk. Akbaatatdía ilissáachkaashe ii chilasshihták datchúshkaashbiak. Báakukkoon Akbaatatdía ii baa xiassaahchek. ¹⁹Heelak hileen bilaxpáakeesh baa baatcháatdiak áaahkuohmaachik. Ii kootéesh Akbaatatdía bilaxpáake al éhcheilush daacheesh heem hileen bilaxpáakeesh kuk kal éhkuum kuss ihchi xíassaakaasshek. ²⁰Akbaatatdía hinna awé díawasseesh kukaatáahilia an baatcháachim ii baa koochihtéesh dak ala kootám baaxpéesh dak awákaassuuhtaa éwahchetaahinmiawuulak kootíihmaachik. Heem Akbaatatdía awé áakeen ammaa díash bilaxpáakeesh kal ii éhcheilush daachik. Heem “Akbaatatdía bik baalaaxtatáahilik.” huulak ii biísshwioolak kuk baaleetak. ²¹Heem Akbaatatdía ala kooté éhkuuk. Heehtaa ammaa an díash ii chikittaakuússaak kusséesh “Ahóoh.” hessuuk. Itchihk an baa dasshihtúua iháattaak kúmamaam chihpashdák ko kala kootúuk. Akbaatatdía al éhchehche éhchewioolak aliilúuleetak.

²²Kal íwahkootuum kootáa it “Baa éwahkuuk.” helitdelelok. Chiwúsauleetak baa ala koottáahile éhchewioolak aliilúuleetak. ²³Kootáa Akbaatatdíam ii baa koochihtéesh ko kuss chiwakíissaa itchihk bilaxpáakdia xuh dakáakdia xuh baaaxuawishdía xuh íaxassaaliak ko kuss chiwakíilitdelelok.

²⁴Deéla daasalakootúuash kúkkán baa ala kxawíiash koóum háaksee Akbaatatdía daasanníalíahchek. Heem hileen

bilaxpáakeesh kannaa batshúak íin bach kussaáu axúoo aák baa an dusshít diak áaahkuuk. ²⁵Haak Akbaatatdía ala koottáahileesh kuk kan kalátchewiassuuk. Itchihk bale bísssheesh ko kaláttuuk. Akbaatatdía baa an díash ko kuss chiwakáak Akbaatatdía ii axúu kuk kuss chiwakúissuuk. Heeht kukkala ko dáasheesh báaxxiio ii baa koochihtíish daachik. Kootíih. Ahóoh. ²⁶Jews ak kootásseesh baa ala kxawíihilak baa an dusshít diak koowéewioolahtaa baaleetam Akbaatatdía koochéehchek. Kalako ii batée ala xatáau ko kala kootúuk. Haak bíahntaa kúh kala kootúuk. Heem kuk kan baa iháattaahilik. Kalako ii Akbaatatdía dúusaak déek. ²⁷Haak bachéesh kúh bassáam bí ko kulutáxxaatuuhntaa koowíiak bachéesh íin bach kussaáush kan baa an dusshít diook. Heem Akbaatatdía díakxawíikaasshek. Heeht íltaa ihchi díook baa kxawíihiluum.

²⁸Deéla Akbaatatdía ala koottáahileesh hileen bilaxpáakeesh éhchewiassaak kootáa dassihchiwíassuuk. Heem Akbaatatdía ilúuhaawim déehchem kuk kan baa an dasshihtaát do baa kxawíia kala ko dasshihták díoo ii chiwúsaau púook. ²⁹Kal íwahkootam baa an batshúashiishiaahe chiwúsaau ílutchikuuk baa aáchiahak bilaxpáakeet bach xawíiahkaak bach íahaahak eétichissak baa dappiiáhak bat balúuak bach kúakaassaak bat sheekaalák bach al ilíiwisak ³⁰bat baafk shiiák Akbaatatdía dúupiook. Baa batchooléehkaak bach innáaulak xawíikaassaak kootáa baa íaleetuuk. Iláaulak baatcháattaak kúkkan baa ala kxawíishiishiaahe xaxúu chíilak díook. Aksáaush koóuht al iláau iikukkússuuk. ³¹Baa éhcheleetaatdelok. Kúkkan baa ala kxawíia akúkassahke díook. Eehkoon baam díawiakaasaatdelelo baaleettáahiliiluk. Is bilaxpáakuuhtaa íchishissuuk. Kootáa áatche baa aáu chíilakaauk. Baa éhkoon ialittaá bat daásdeel ítbialichissaataahiluuk. ³²Akbaatatdía is baleilíiaakaxpisseesh an baalaáttuush hilíashiiok. “Bilaxpáake íwahkootuulak bakáalaaliche bale shée koók.” éhkuuht it kootáa díook. Kootáa aalasshipaatúuk. Deéla hawéeseesh kúh kootúut ii daásitchiiluk.

Akbaatatdía an baa chilasshihché

2 Baa iháaum dáhchilasshihtak ammaa ala kxawíiannioo ii sheelakáaluulak kootáa díiluh koótduum díhchi sheelakáaluuk. Díhch aláchihpasshiwialuulak annúuleetak. ²Jews ak kootássuum baa ala kxawíia ko díoosh Akbaatatdía

kon sheekaannák baa ala koótdiam éwahkuuk. ³Hinna íwahkooteesh kalako ii baa iháate baa ihée ko aalaliáf kalakoon dínnaxuoo díaluulak “Akbaatatdía bik bii sheekaalíssaataahiliihmaachik.” dílíachissaataahilalah. ⁴Akbaatatdía baa daásdeekuuk daasátchuchkaasak dii díakxawiiwiasseesh kalaaxtássaalah. Heem Akbaatatdía díluuluu kusseéssaalah. Dii daásdeek díhkulupioolak hiliachim élahkuuk. ⁵Heehta dalásua chichútak dii shíishtuum díhkulupiwialaassuuk. Heem Akbaatatdía ala chilassihché annawéelak bilaxpáakootaa éhchelhela hilaa kan dii datchúshkaashiohmaachik. Dílala an díhchi díluu áxpilahkuuk. ⁶Heehta ii íkuxxachia ammaa an díluuash Akbaatatdía ak bakáala dí koók. ⁷Bilaxpáakuuk daasátchutak ammaa an dáitchiiak koowéessaak ammaa an díoo ii Akbaatatdía isítcheehchewiak ii shéleetbioosh Akbaatatdía an bilaxpáakiiwaakoochihte kuúihmaachik. ⁸Akbaatatdía bilaxpáakuuk baa eétichissak baa aashtátak al ilíia kalátchessaak baa al iháate ko díakaawioosh ilissáachkaashe ii datchúshkaashiihmaachik. ⁹Akbaatatdía bilaxpáakuuk baa kxawíhilaahkuuash xaxúa baailíshehcheihmaacheesh kalako ii páxpiohmaachik dúpta Jews dak ak kootásseesh. ¹⁰Heehta bilaxpáakuuk ammaa an dáitchiiak koowéseesh Akbaatatdía kon chikittaakuuák baakoon ítche daachíhchek dúpta Jews dak ak kootásseesh. ¹¹Kooták. Akbaatatdía an balee íkee biixaxúa balee bach kuxxáhchek.

¹²Jews ak kootásseesh baleilíiaakaxpisseesh Moses bilikkúuash eéssuuk. Heem ammaa ala kxawíhiluuash ii Akbaatatdía koon shía déehkaak baa ii baa koochihtéesh koon iháaxiihmaachik. Jews kuk baleilíiaakaxpisseesh éhkuuk ko ii chilassihchíohmaachik. ¹³Heehta baleilíiaakaxpisseesh ak éhche Akbaatatdía al íkee ii annawíssuuk. Deéla ak éhkaak díakaauush kuttáche annawíhchek. ¹⁴Jews ak kootásseesh baleilíiaakaxpisseesh dútchissuuhta shóon díoot an díailush daachim daasawúuan éhkuuash ii xíassaahcheik. ¹⁵Kooták. Baleilíiaakaxpisseesh daasawúuko baalaátuuash ala xatáau ii xíassaahchek. Heem ii ammaa dasshihtúuash ko aalíiaahkak ta xuh óhchiptaaahkuuk. ¹⁶Heem Baleiichiweéftchim ii balíash ala shífosh baapiiháakdak Akbaatatdía Christ Jesus

chúuss baa hilák bilaxpáakkootaa ammaa dasshihtúua dak ammaa xíakaattaa díoo ii chilasshihchíihmaachik.

Jews kootéesh dak baleilíiaakaxpisseesh dak

¹⁷Diiluk dii shóotuu? “Bii Jew kooták.” daak baleilíiaakaxpisseesh bíálaakaasuuk. Deéla “Akbaatatdía is bilaxpáake bíiluk.” daak ii dii ilíiwaaisaalaailuk. ¹⁸Haak deéla baleilíiaakaxpisseesh élahkuum kan baa annawéesh kúh élahkuuk. Heem Akbaatatdía kan dii sáapdiahchewioolak kal élahkuuk. ¹⁹Heem “Ak ishtáleeteesh kal ak dakaaelichéesh bíiluk.” daak élahchetaahilaatdelelok. Deéla hám ala chihphashéesh it koolúuk. Heem “Biláakisshe ii baa íkaalituuash bíiluk.” duuk. ²⁰Baawaalaáchim Baaxpéesh daáum kúkkán hinna baleilíiaakaxpisseesh élahkaak kan baatách xaxúia élahkaak baa ala sheelúua koottáahiluuk dilíatuuk. Jews ak kootássuum daásbaalaaxdahcheesh “Baánmaliwiawaalak anmeéwishik.” dilíatuuk. Haak kootáa baa éhcheleeteesh baakáatuulak ko kala koótdahcheesh “Baachimmíwahchewiawaalak anmeéwishik.” dilíatuuk. ²¹Heem ii baa ihée baachimmílahkuuhilak. Sáapii díhchi baachimmílahchessuu? “Baa ataalíssaalah.” daak kootáa diiluk it baa atdáaluuk. ²²Díiluh hilíasheluuk. “Bach kataalíssaalah.” duuk. Heeht diiluk dii shóotuu? Deéla “Hileen baa iháalituum kuss chiwakáaush baa hámneetuum bulupíook.” daak kootáa kooté ala koolúuash awaasúua kuss baa atdáaluuk. ²³“Akbaatatdía baleilíiaakaxpisseesh Jews bíilun bilikkuúk.” daak ii dilíiwaaisaalaailuk. Heehtaa baa ala shee díalaassaa Akbaatatdía baannushítduuk. ²⁴Hinna íwahkootéesh Baawaalaáchim Baaxpéesh awúuan an baalaátuuash hilíashiiok. “Hileen Jews ak kootásseesh Akbaatatdía dáasheesh ii iláak xawíikaassuuk. Ii kootúuash Jews kooté baa ala kxawíiannualuum koók.” huuk.

²⁵Akbaatatdía ammaa íkuchkeesh ii díaluulak Jews kooté alaxatáau al ii díaluua ítchik. Heehtaa Akbaatatdía ammaa íkuchkeesh alaáchiwissuulak Jews kooté alaxatáau al ii díaluua dii kuxsalákussaaohmaachik. Heelak díalaassuulak alíatdeetak. ²⁶Jews ak kootássee Jews kooté alaxatáau ii díassuulahtaa kootáa Moses is baleilíiaakaxpisseesh ammaa ala shéesh díoolak Akbaatatdía

al íkeesh kúkkán hileen Jews kooté al íkee ko kala kooták. ²⁷Heem Jews ak kootássee Jews kooté alaxatáau ii díassuuhtaa hileen ahóom baleilíiaakaxpisseesh ammaa ala shéesh díoosh díiluss hilíashiiok. “Akbaatatdía an dii eéssuuash annawík.” heohmaachik. Kooták. Jews kooté díiluk. Haak Baawaalaáchim Baaxpéesh daáuk. Heehtaa baleilíiaakaxpisseesh dilússhishiiluk. ²⁸Bachéem hinna al aaiáxtaauh kootám chúuss déelahtaa ii Jew kootáhchessaak. Jew koottáhileesh axúia ii xíassaassaak. ²⁹Heehtaa hawáteem an bilaxpáakeesh dak ammaa dassihchéesh dak kulusshíilak bilaxpáake báaxxiassuulahtaa Akbaatatdía koochéihmaachik. Heelak Akbaatatdía Iláaxbaaxpee daasé kummíliihmaachik. Iwak ii Jew koottáahilim koóihmaachik. Baleilíiaakaxpisseesh kuk baaleetak.

3 Heehtaa Jews kootéesh akítchilaak an bilaxpáakuua ittáak ak kootásseeesh kuk kootássuuk. Haak hinna al aaiáxtaau kootám ko ii Jews kootúuash chúuss daáulak ko heetashtáauk. ²Kooták. Biiluk Jews al ii binmiáwuua ahúk. Kala héele baatcháache Akbaatatdía al ilíim baaxpéesh bilikkuuák íassaawaak bahkulaáulak hiliachik. ³Heehtaa Jews kooté ahó al ilíiash díassuuhtaa Akbaatatdía al ilíiash it díataahiliihmaachik. ⁴Iwak koottáahilik. Bilaxpáake xaxúia bísshiiiluk. Heehtaa Akbaatatdía kuk baa ala shéesh díalaachik. Baawaalaáchim Baaxpéesh awúuan an baalaátuuash hilíatak

“Dilíit an dilíiash koottáahile bilaxpáake éhcheohmaachik. Heelak dii ak aashtátdeetiimaachik.

Baa sáapaatdak an baa iláauasheesh ishkawúuan dii chilasshihtúulak diiléen baa dáxsheelihmaachik.”

⁵Heeht hám hilíasheelitdeohmaachik. Aaláa bale batshúa an díawuua ii Akbaatatdía baa annawée kannaa xiassaakaassaáhiik. Kootdák Akbaatatdía balee ilissáache ii balee baa chúuss deehkaáhnak baa iháatchek he? (Bilaxpáake an dasshihtúua íwak koóhtaa annawíssaam bik éwahchek.) ⁶Iwak kúh baaleettáahilik. Akbaatatdía biiluk Jews baa chilassihchíssaalak shóotaak awé áake bilaxpáake chilassihchík he? ⁷Heehtaa an bii bíssak baa al iháatbeesh ii Akbaatatdía alasáashiiwaaxpeesh dak an baa koottáahile dak kannaa xiassaakaassáak kalako ii bilaxpáake

Akbaatatdía dáashe báaxxiiohmaachik. Iwak kootdák baa ala kxawíliwaahtaa Akbaatatdía ii bii eéssaish daatdeetak. ⁸Iwak ii bilaxpáake ham bii batchooléehkaak bii ilíitaak bii hilíashheekuuk. “Día kootdák baa iháatbaawahkuulak ii Akbaatatdía itchihk aaláa balee ítchiiawilikkuuih.” huuk. Heeht kal ílaa ihchi kxawíiaok.

bilaxpáakdaht baa tátchileetak

⁹Heelak kootdák Jews ak kooté balee heetashtée? Baaleettáhilik. Hilaa sheewéesh koók. Bilaxpáake xaxúa Jews dak ak kootásseesh dak baa ala kxawíash chiwúsaau awúualam kal ii ihch aliilúuleetak. ¹⁰Baawaalaáchim Baaxpéesh koon shiiák

“Bilaxpáake hawátkaatdaht baa tátchileettaahilik.

¹¹Haak ílaa hawátkaatdaht baa ala kooté éhchewiassaak. “Hilósh Akbaatatdía bii koosáhtakaatdak ítchiihmaachik.” hawátkaatdaht hilíachissaak. Iwahkooteesh íkaalichissuuk.

¹²Bilaxpáakeesh Akbaatatdía kuss ísaweessuuk. Heem xaxúa kan baa haawaatúuk. Haak hawátkaatdaht baa ítcheewiassaak. Hawátkaatdaht kootássaak.

¹³Uuwuuo shishíoo ii ilíshiak kúmmaam déeshishkuua ammaa annúusaam bilía hóppakaaush ko kala kootúuk.

Al íláu ii baa kúailuk.

Iaxassee baa dáapxuua cheétiilushkuuo ko kala kootúuk úuwuosh ammaa iikusché.

¹⁴Baa íiwaaxxua dak bale ilíikxawíia ii úuwuuo ílutchikak koon iikustáalahkuk.

¹⁵Heem iiwaachíssaak baa íáxxohkaak baa dappeéiluk.

¹⁶Haak shóon daáu baa kxawíiak baa daásxawíiaok.

¹⁷Ko bilaxpáake koowáte an bilaxpáakuua al íttaahkuuash alaaxtatáhiluuk.



Romans 3.13

18 Haak Akbaatatdía an baaxpéesh alaxaxíssuuk.” huuk.

19 Heem Jews kootéesh baleilíiaakaxpisseesh xaxúa hawátuum ak isaawiaxséeleesh kuttátuum kal éwahkuuk. Kalako ii Jews kooté kúh baa ala kxawíhíluua ii bíssaatbioolak baaleetak. Akbaatatdía an baa chilassihchíish daacheesh baak ii bilaxpáake xaxúa Jews dak ak kootásseesh dak biixaxúa ii balee chilassihchíihmaachik. 20 Ii kootéesh sapéolahtaa baleilíiaakaxpisseesh ammaa ala shíio xaxúa díoolahtaa Akbaatatdía al íkeen it annawíssuuk. Itchihk baleilíiaakaxpisseesh bilikkuuák ii ammaa kxawíanniawuuash éwahkuulak hiliachik.

Akbaatatdía bilaxpáake ak annawíhcheesh koók.

21 Heehtaa Akbaatatdía an balee annawíhchewiash kala xíassaahchek. Heem baleilíiaakaxpisseesh ala hilitdeettaahilik. Akbaatatdía ammaihchiláakuuhche dak baleilíiaakaxpisseesh koóuhtaa shíio. 22 Heem Jesus Christ ala kaláttuuash Akbaatatdía kan bilaxpáake ii annawíhcheesh koók. Jews kootúu xuh kootássuulak Akbaatatdía íwahkootaakuuk Jesus Christ ak kalátcheesh. 23 Bilaxpáakeesh xaxúa baa ala kxawíhíluuash ii Akbaatatdía alasáashiiwaaxpeesh íkaawioolak anníhiissaak ala kootéesh koótdewioolak baaleetihmaachik. 24 Heehtaa Akbaatatdía Christ Jesus chúuss baa hilák balee kulustawilikkuuák balee annawíhchek. An balee daásdeesh kalako ii ílaa íwíshdeettaa díawilikkuuk. 25 Akbaatatdía dáakbachee awé áakass húuhchem sapéelahtaa kalátchelak is íile kal ii baa ala kxawíhíleesh kalaaxtakuúk. Akbaatatdía ii koochéesh an baa annawéesh ko balee óowiawiak. Heem anmasshipúuash bilaxpáake ammaa al iháattaak ammaa kxawíhíluuash íkahtaa daasátchuchihkaak ak alaaxtéetdaak daachík. 26 Heehtaa hilaakée Akbaatatdía baa kxawíannioo hawassíiak ko ii bitáaxiik daasátchutdassheen baa annawéesh óowiaitchewiak. Haak Jesus ak kalátcheesh baa annawíhchek. Iwahkoocheelak iixúash baa koottáahíleesh kóosh kala ko balee óowiak.

27 Hinna íwahkootéesh kalako ii “Baleilíiaakaxpisseesh ammaa ala shéesh kuttáche an díawuuash ko ii Akbaatatdía balee annawíhchek.” baak ii balíwaaisaawuulak an baláaush awuúleetak. Itchihk Christ kuttáche an bahkaláttuuash ko ii

Akbaatatdía balee annawíhchek. ²⁸Heem bilaxpáake kal ii baa annawíhkuuash Akbaatatdía kusseé an baa kaláttuuash kuttáchik. Hileen baleilíiaakaxpisseesh ammaa ala shéesh díoolak kuk kussaak. ²⁹⁻³⁰Akbaatatdía hileen Jews kooté íluttat ko is akbaatatdíassuuk. Akbaatatdía hawátkaatam Jews kooté dak ak kootásseesh is Akbaatatdíooosh koók. Kooták. Akbaatatdía hawátkaatak. Iwak élahchekaasuuk. Heem Jews kooté dak ak kootásseesh dak an baa kaláttuuash ii iilápta annawíhkaak hawáteem bassáhchessaaihmaachik. ³¹Kootdák hinna an baa bahkaláttuuash ii baleilíiaakaxpisseesh haawaátbuu? Baaleettáahilik. Itchihk kannaa báaxxiwuuk.

**Abraham an bilaxáake bale baa
kalátche ii baa xíassaahchek.**

4 ¹⁻³Abraham dasshihtáalah. Jews biiluk bas baaxaalióo akúkaassahkeesh koók. Baawaalaáchim Baaxpéesh awúuan shiiák “Abraham Akbaatatdía kalátchek. Heem Akbaatatdía al íkeesh Abraham baa annawíhchek. Heem Abraham ammaa an díash baa annamnák ii ilíiwaaiseelak kootchichéek. Heehtaa Akbaatatdía ishóocheen koochéewialak kuk baaleetíhmaachik. Heem hilaakée ko ii balíiwook an bilaxpáakeesh ala kootéesh. ⁴Ikaak bachéem baa hinnák íiwishdiok. Heem hinna íiwishdioosh ittákkaa kuússuuk. Hinna baa hiléesh bakáleesh koók. ⁵Heehtaa Akbaatatdía bilaxpáakeem an baa kalátche ii dasshihták annawíhchewiak. Heem ak batshúa kootáa an baa hiléesh ihchi bíalichissaa Jesus Christ ko kaláttaak Akbaatatdía al íkee annawím kal ii iléihmaachik. ⁶⁻⁸Deéla Buuwaaxpée koon David huuash hinné baalaáchik.

“Akbaatatdía bilaxpáakeem ammaa iháatcheesh
kalaaxtakuulák ammaa kxawíihileesh kúh
kalaaxtakuulák kan baa daásitche koóish daachik.

Bilaxpáakeem baa ala kxawíianniash Akbaatatdía kal
ii dúuhpee baalaáchissaalak kan baa daásitche
koóish daachik.” huuk.”

Ko ii shóotahchelak bilaxpáakeem an baa hiléesh shóotdaht Akbaatatdía baa annawíhchelak kan baa daásitcheesh koók.

⁹Heelak kootdák Akbaatatdía ischawúuan Jews bíluttach balee iluúhche? Baaleetak kootássaak. Hawéeseesh kúh

baaláhkuk. Hilíasheweesh koók. “Abraham Akbaatatdía ala kalátcheesh ii baa annawíhchek.” ¹⁰ Akbaatatdía Abraham it Jew kootáhchessaa annawíhchek. Píishchiisaa hilaa Jew koótdek. Hinna íwahkooteesh dasshihchikaásaalah. ¹¹ Kootáa Akbaatatdía Jew ala kootáhcheesh hinna an baa kalátche Akbaatatdía íkaak al annawíhcheesh ii baa xíassaak. Heem Akbaatatdía ak kalátcheesh Abraham is baaxaalioo akúkussahkeesh koók. Haak Jews kootássuulahtaa Akbaatatdía kaláttuulak kan baa annawíhchek. ¹² Kooták. Jews kootéesh is baaxaalíoo akúkussahke Abraham koók. Heehtaa kúh sapéolak an baa kaláttuua Abraham íischiisaa it Jew kootásseesh an baa kalátcheesh kala kootúulak is baaxaalíoo kúh koók.

Akbaatatdía Abraham kuss ihchi baa ímmiteek.

¹³ Abraham dak is ílannee dak Akbaatatdía ammaa díakuuwia hinna awé kootáa ala kuuwía koók. Ii kootéesh Abraham baleilíiaakaxpisseesh ammaa ala shéesh díalak kussaak. Heehtaa an baa kalátcheesh Akbaatatdía kon baa annawíhcheesh kalako ii kooták. ¹⁴ Baaleetdák Akbaatatdía hileen ammaa ala kuuwíash baleilíiaakaxpissee ammaa ala sheé ak díash ko díakuulak bilaxpáake an baa kaláttuuash dak hileen Akbaatatdía kuss ihchi baa ímmiteesh baa hámneetiohmaachik. ¹⁵ Baleilíiaakaxpisseesh awúuan an baalaáttuuash hilíashiiok. “Akbaatatdía bilaxpáake xaxúa ak baa iháatcheesh datchúshiihmaachik.” huuk. Heehtaa shóoleet bale baa íkuchke kooléesh ak dússhishissaaleetak.

¹⁶ Heem Akbaatatdía bahkaláttuulassheen Akbaatatdía an bíiluss ihchi baa ímmiteesh bulutchíwohmaachik. Kooták. Akbaatatdía Abraham ammaa kúuash bilaxpáakuum Abraham aksáhkuuash xaxúa ílala kuuwíak. Hawátuum baleilíiaakaxpissee isaawiaxséeleesh kuttáchissuuk. Heehtaa kúh Jews ak kootássuum Abraham an baa kalátcheesh kala kootéesh kúh attáahiluuk. Heem biixaxúa bas baaxaalioo akúkussahke Abraham koók. ¹⁷⁻¹⁸ Baawaalaáchim Baaxpéesh hilíashiiok. “Bilaxpáakshiishiaahe ahóom is baaxaalíoo akúkussahke kan díik.” huuk. Akbaatatdía íwahkoosheesh koottáahilik. Abraham Akbaatatdía ammaa ala shéesh kalátchek. Kúh hilíashiiok. “Dís ílannee eek ihké baan chiumaachísseesh kootíohmaachik.” huuk. Abraham dak uá

dak kan baaisáatak kan baan dáakbisaachissuuhtaa kootáa it kaláttaak baa óolik. Baam kala sheeláhtaa Akbaatatdía kaka bilaxpáakahchewialak kootíhmaachim éhchek. Deéla ammaa al ii iichiwéesh kootbíash kootdák ko kala kootám éhchek. Heem Abraham baa kaláttaak daasátchuchihkaak óoleesh kalako ii “bilaxpáakshiishiaahe ahúm is baaxaalioo akúkussahke koók.” ¹⁹Is báalee itta pilakisáalaak. Ih axúa kala sheelák ko kala kooták uá Sarahsh kúh dáakbishinneetak. Heem Abraham ii dasshiehchilák it daásduupassaataahilik. An baa kalátcheesh baatcháatak daasátchuchihchek. ²⁰Abraham an baa kalátcheesh dúushiissaak Akbaatatdía ala kuss ihchi baa ímmitee díawiam daásduupassaak. Itchihk an baa kalátche áxpíhcheesh ii kan baaisáahtaa dáakbishbiook. Heem Abraham Akbaatatdía dáashe ii báaxxiak. ²¹Akbaatatdía ammaa ala shéesh koochéewialak kootíhmaachim daásduupassaataahilik. ²²Kal ii íwahkooteesh “Akbaatatdía kal ii baa annawíhchek.” huuk. ²³Heehtaa bale ilíia “Akbaatatdía kal ii baa annawíhchek.” heesh ko kuttáchiichessaak. ²⁴Bíiluh baalaátbilikkuuk. Hawátam Baxxiilaatúua Jesus bilishée héeleen chiléhcheesh bahkaláttuum bíiluh Akbaatatdía balee annawíhchek. ²⁵Ammaa ala kxawíanniawuuash ko ii Christ dappíosh ii hilaakée Akbaatatdía balee baa annawíhchek. Deéla kaka bilaxpáakahkaak balee baa annawíhchewiam éwahchelak hiliachik.

Akbaatatdía koóm baa annawíhchek.

5 An baa bahkaláttuuash ii Akbaatatdía an balee íkee balee baa annawík. Heelássheen Baxxiilaatúuash Jesus Christ ammaa an díawilikkuuash ii hilaakée Akbaatatdía awáxpak kan baakoon ítche áawahkuuk. ²Christ bahkaláttuulassheen Akbaatatdía ishóoche balee aahíik. Hilaakée Akbaatatdía balee daásdeeawilikkuualaachim éwahkuuk. Akbaatatdía alásáashiiwaaxpeesh balee baaláhkahchewiam balásduupassaa awóolum kootáa ala kootéesh balee kootáhchewiam ii balee daásittak baawihkammáatuuk. ³Heehtaa kúh an baa baalúuwuuat kalako ii an balee daasátchucheesh ii éwahcheiluk. Heem an baa baalúuwuuash héelapko kúh Christ an bahkaláttuuash kalako ii balee baa chúuss déehkuut heehtaa it baawihkammáachiiluk.

⁴Balee chilasshihtúulak an balasátchutuush ii bakkatúum Akbaatatdía balee báaxxiak. Koochéelak baa baatcháache díawilikkuuwiam balásduupassaak awóolak balee daásittak baawihkammáatuuk. ⁵Baa bahkaláttaak awóluulak balee batchooléessaaihmaachik. Ii kootéesh Akbaatatdía Baleiláaxbaaxpee bilikkúuash chúuss baa hilák an balee íchishhikaashe balee éhchehchetaahilik.

⁶Kan balee ihch alfinneettaahilim kalakoon Akbaatatdía al íkuxxaahche koóm Christ húuhchem biiluk balee ak baa kxawíihilehtaa saawilikkuúk. ⁷Bilaxpáakeem baleilíiaakaxpisseesh dúsishishdeetdahtaa saakuuwíoolak baalúuihmaachik. Heehtaa aaláa baa bilaxpáakitcheem saakuuwíoolak baaluusséshtakaatiihmaachik. ⁸Heehtaa it balee ahkúxdeetak Akbaatatdía iitchúuwaak baa kxawíia ahníawuuash héelapko kalakoon Christ húuhkaak saawilikkuúhchek. Kalako ii Akbaatatdía an balee íchisshe baatcháache balee íkaahchek. ⁹Christ shéexawiikaasheesh ii Akbaatatdía an balee íkee balee baa annawím balee kulustakuutáahinmiam balee datchúshissaaiahmaachik. ¹⁰Akbaatatdía is koochíia bíiluk. Heehtaa dáakbachee saawilikkúuash kalako ii hilaakée bat biilápaatuuk. Deéla Christ kaka bilaxpáakak. Heem baapiiháakasse balee kulustakuutáahiliihmaachik. ¹¹Iwahkootesh kuttáchissaak. Baxxiilaatúua Jesus Christ ammaa an díawilikkuuash ii baawihkammáachkaasuuk. Kooták. Hilaakée Akbaatatdía iilápaache bíiluk. Bach awáxp baa díawuua ítchiwuuk.

Adam dak Christ dak

¹²Hinna íwahkootesh xaxúa bilaxpáakhawatkaatam Adam huuash baa iháatchem kalako ii baa ala kxawíash awé kootáa híik. Hinna baa kxawíash chiikúss ii bale shéem kuss húuk. Kalako ii Adam an baa kxawíihileesh awé áake bilaxpáake xaxúa áxpak kootúuk. Heem bale shéesh awé áake bilaxpáakkootaa híik. ¹³Baleilíiaakaxpissee it bilikkuússuush kukaa bilaxpáake baa iháatdiok. Heehtaa baleilíiaakaxpisseesh it koolássaam baa kxawíihiluuhata ammaa dúsishisuuleetam Akbaatatdía íkaahata daasátchuchihkaak ak alaaxtéetdaak daachím ii baa ilusshíchiilush daatdeetak. ¹⁴Heehtaa Adam hawátam

huuwíash ii baa xíassaahaa Akbaatatdía al ilíiash díassaak. Heem Adam koottaléesh kalakoon aa Moses bilaxpáake Adam an baa kxawíihileesh koochéessuulahtaa súuk.

¹⁵ Akbaatadía baa íiwishdeettaa bilikkúuash Adam ammaa kxawíihile ko kala kootássaak. Hileen dúupta bach kala kootássuuk. Bacheé hawátkaatam Adam huuash ammaa iháatcheesh ii bale shéesh bilaxpáake xaxúa chúuss daáuk. Akbaatadía baa íiwishdeettaa bilikkúuash kuk baatcháachkaashik. Hinna bacheé hawátkaatam Jesus Christ huuash bilaxpáake daásdeeakuukaashim Akbaataatdía bilaxpáake ahóom an baa annawíhche baatcháachkaashik.

¹⁶ Kooták. Hileén kúh dúuppeeok Akbaatadía ammaa bilikkuuá dak Adam ammaa iháatcheesh. Ko bacheé hawátkaateesh ammaa ala kxawíihileesh ii Akbaatadía datchúsak eéssaak. Heehaa baa ala kxawíianniawuuhtaa balee anníhiissaahaa Akbaatadía íiwishdeettaa bale baa annawíhche bilikkuúk. ¹⁷ Kooták. Bacheé hawátkaatam baa iháatcheesh ii bilaxpáake xaxúa bale shée díiohmaachik. Bacheé hawátkaatam Jesus Christ an baa an díash ko baatchaatéek. Akbaatadía baa íluuakuuak baa íiwishdeettaa annawíhcheesh xaxúa Christ áxp baa hilák baa kxawíiash dak bale shéesh dak axshéehmaachik.

¹⁸ Kúh bilaxpáakhawatkaatam Adam huuash baa iháatchewasseesh ii bilaxpáake xaxúa saaláaliik. Baa koottáahilim hawátkaateesh Christ díash ii ak kalátcheesh xaxúa kulustakuuák an bilaxpáakiwaakoochihte kuúk.

¹⁹ Heem bacheé hawátkaatam Akbaatadía al ilíiash díasseesh kalako ii bilaxpáake xaxúa ak baa kxawíihiluuk. Kúh bacheé hawátkaatam Akbaatadía al ilíiash díash kalako ii bilaxpáake ahóom Akbaatadía annawíhcheihmaachik.

²⁰ Heem hileen baleilíiaakaxpisseesh Akbaatadía bilikkuuák bilaxpáake ii íkuxxache shóotaak baa ala kxawíihile xawíikaashdak éhchelak hiliachik. Heehaa bilaxpáake baa ala kxawíihiluash kannaa xawíikaashdawik. Heem Akbaataatdía al ítcheesh dak an baa íchisseesh dak kannaa áxpíhchek. ²¹ Kal ii háake bilaxpáake xaxúa baa ala kxawíiash kalako ii shéeluk. Kúh Akbaatadía al annawíhcheesh ii daásdeeakuuash kalako ii Baxxiilaatúuash Jesus Christ an bilaxpáakuua ii baa koochihtáhchek.

Baa ala kxawíash ii balee awásshahchewialak baaleetak.

6 Baa ala kxawíanniawuuhtaa Akbaatatdía it balee daásdeeawilikkuuk. Heem ammaa an baawalaácheesh bakálee sapéelahtaa hilásheehiimaachik. “Aaláa baa ala kxawíanniawuuash koómmaassuulak Akbaatatdía kannaa balee daásdeeak balee kalaaxtawilikkuulah kúihmaachik.” ²Eek baaleettáahilik. Kal ii dúuhpee baa kxawíia diawaawississuuk. Heem baa kxawíia díawaawaakahkussaawohmaachik. ³Hinné chichéhkaalah. Balee bilihphíhkuulak Christ Jesus awáxpak balee hawátkaatbiak ii awáxpak baasúulak ko kala kooták. ⁴Hinna íwahkooteesh balee bilihphíhkuulak awáxpak balee dúusaaulak ko kala kooták kal ii dúuhpee baa kxawíia díawaawississuulak baliachik. Haak an baatcháacheesh ii Iilápxe bale shéesh koon Christ chiléhchem bíluh an balee bilaxpáakeesh hilaakée bihchi bulutchítchiwaawiuulak kootíihmaachik. ⁵Christ ala shéesh awáxpak balee hawátkaatam ala chiléhcheesh bíluh balee koochéehiimaachik. ⁶Kal ii dúuhpee hinné bahkalaaxtássaawook. An balee bilaxpáakee ískoom baawatbakálaam Christ áxpak kussiók. Heem Akbaatatdía an baa ala kxawíliawaawissuua haamnák hiliachik. Heem baa ala kxawíia balee is dáatchessaalak hiliachik. ⁷Baasúulak kal ii dúuhpee baa ala kxawíia balee is dáatchessaak. ⁸Christ awáxpak baasúum bíluh awáxpak kaka balee bilaxpáakiihmaachim éwahkuuk. ⁹Akbaatatdía Christ bale shéesh koon chiléhchem éwahkaak kal ii dúuhpee shéeleetiihmaachim éwahkuuk. Kal ii dúuhpee bale shée is dáatchessaaihmaachik. ¹⁰Hawáttaakaattaa saák ii baa ala kxawíash ihchi is dáatchehchessaak. Haak hilaakée Akbaatatdía kal áxpak dahkák áxp baa hilík. ¹¹Díluh an díhchi dáasshihtuuash kal ii dúuhpee baa ala kxawíannialaalissuua písshe daléessaaliilush daachik. Itchihk Baxxiilaatúua Christ Jesus dak dii hawátkaattaak ii hilaakée Akbaatatdía kan dáhchikittaalakdiilush daachik. ¹²Iíska baa kxawíia disítchiluash hilaakée kal ii dúupe dii is dáatchessuulak koók. Ammaa kxawíannialaalissuua ii dihch is dáatchehchessaalah. ¹³Kúh daxúoo áppaa baa ala kxawíash ii díassaalah. Itchihk Akbaatatdía

an dii bilaxpáakuua kulusshíim Akbaatatdía díhchi kuuáalah. Heelak kon baa annawéesh ii dii díaohmaachik. ¹⁴Kal ii dúupe baleilíiaakaxpisseesh dii ihchi píisshe déehchessuuk. Heem baa ala kxawíannialaalissuua dii is dáatchessuuk. Itchihk Akbaatatdía al íтчikaatam dii óowiak dii kuxsák baa ala kxawíia dii híihchessuuk. Ammaa kxawíannialaalissalakaau díhch is dáatchehchessaalah.

Ammaa dáhkalattuash sapéelak dáxxiilaatuaa koók.

¹⁵Baleilíiaakaxpisseesh balee isaawiakséelassaak. Hehtaa Akbaatatdía balee daásdeeawilikkuuk. Balee kulustawilikkuuíhmachik. Aaláa hilaakée balee baa kxawíannahchek. Baaleettáahilik. ¹⁶Hinné élahchetaahiluuk. Sapée kuss díhchi dátcheelitdak dáxxiilaatuaa koók. Baa ala kxawíash ko dilúttuulak Akbaatatdía koon shía dii déehcheohmaachik. Kootáa bale shéesh koók. Akbaatatdía ko dáhkalattuulak kalako ii an dii bilaxpáakuuash annawíhcheihmaachik. ¹⁷Iísiko an baa ala kxawíannialaalissuua dii is dáattuuhata hilaakée bale ilíia hilaakám bale baa annawé ii dii baachimmíhkuuash ko ii dalásuua díalaataahiluuk. Heem Akbaatatdía kuss “Ahóoh.” baak. ¹⁸Kal ii dúuhpee an baa ala kxawíannialaalissuuash dii is dáatchessaaohmaachik. Hilaakée baa annámnaawialuuash dii is dáattuulak ko kala kooták. ¹⁹Ii íwahkoosheeweesh an baa dii éhchewahchewiawuua ii xíassaawahchewiawaak. Iísiko baa al iháatduuash dak baa dáhkalattuuleete dak dalásuua díalaataahilak koótdaak kalako ii kannaa dii batshúook. Hehtaa hilaakée an baa annámnaawialuua dalásuua díalaataahilak díhchikitcheewiaalah.

²⁰Baapanmasshipúuash baa kxawíash dii is dáattuum baa ala kooté dáasshihtaachissuuk. ²¹Ammaa al iháatduuash ii an díhchi dáhkuxsaatuuleetak hilaakée dáasshihtuut ii díhkulupiailuk. Ko ammaa al iháatduuash kalako ii dásak Akbaatatdía dalíissaalohmaachik. ²²Hehtaa hilaakée baa ala kxawíash dii awáss daxhíssuuk. Akbaatatdía dii is dáattuulak ko kan dii kala kootúuk. Hilaakée baa annámnaalahkuua ii kannaa dii baaxpáaush kalako ii bilaxpáakiwaakoochihteesh daáuk. ²³Baa ala kxawíash bakálee bale shéesh koók. Baxxiilaatúua Christ Jesus dak

balee hawátkaattaak ii Akbaatatdía íiwishdeettaahilia bilaxpáakiiwaakoochihtéesh bilikkuúk.

Paulsh bale bach áxpe ii baa xíassaahchek.

7 Akchiwakíiwakupeen díixaxua awé áake bale baa íkuchkeesh ii élahkuuk. Heem hilaakée hinna díiluss baa balaátbiaweesh élahchelohmaachik. Dii bilaxpáakshoohkuulak bale baa íkuchkashiishiaahe dáhkalattuulak koók. ²Hinné ii baa xíassaawaawiik. Bíam chínmishdak bale baa íkuchke ala shéesh chilée áxpe aa uhpatáahile aahíiismaachik. Heehtaa bachéesh sheelák hinna bíash hilaa kaka chínmishbialak kootíiismaachik. ³Heem chiléesh it shéessaa hinna bíash kootáa bacheé ihéem áxpalahkulak kúkkán hinna bale baa íkuchkeesh kan dússhishik. Heem kal ii bíawaalaaxak. Heehtaa chiléesh sheelák hinna bíash kaka chínmishbialak kootíiismaachik. Heelak bacheé ihéem áxpalak alíatdeetak.

⁴Kúh akchiwakíiwakupeen Christ shéesh bíiluh awáxpak baasúuk. Heem bíiluh baleilíiaakaxpisseesh kuss baasúum ammaa ala shéesh ii díawaawíilush daatdeetak. Ii kootéesh ii balee iléewialak baaleetiihmaachik. Heem hilaakée hawátam Akbaatatdía bale shée koon chiléhcheesh dak awáxpak balee hawátkaateesh kalako ii Akbaatatdía ammaa díawaawakuuash ítchiwaawiwuulak anmúuwishik. ⁵Iíska baa ala kxawíianniawaawissawakaau ko ii balee bilaxpáakak. Heelak Akbaatatdía is baleilíiaakaxpisseesh éwahkuuk. Heem kalakoon balásalakootéesh ii balee itbuúko kalapeém ii kannaa baa kxawíianniawuuash kalako ii an baa an díawuuash xaxuatáahilia bale shée ko balee aahiialaachík. ⁶Heehtaa hilaakée hileen baleilíiaakaxpisseesh kusséesh baasúuk. Kooták. An balee is dáatcheesh Akbaatatdía balee kuluschík. Kalako ii ishkawáshtaahile bíiluk. Bale baa íkuchkeem baalaátuuash píisshe beéwiawaawakaaulak ii kootássaak. Itchihk Baleiláaxbaaxpee balee bilaxpáake hilaakkáatam bilikkuúm ii Akbaatatdía ishkawáshe bíiluk.

**Baleilíiaakaxpisseesh baa ala
kxawíianniawuuash balee óowiok.**

⁷Hinna íwahkoosheeweesh aaláa baleilíiaakaxpisseesh baa ala kxawíianniawuuash balee díahcheih. Eek

kootássaataahilik. Itchihk baleilíiaakaxpisseesh koóm ko ii baa ala kxawíia koóm éwahchetaahilik. Baaleetdak baleilíiaakaxpisseesh “Baa ólichissaah.” hessaalak an baa ólituua baa kxawíim koolák baalaaxtáwihmaachik. ⁸Ikaalah. Baleilíiaakaxpisseesh hámneetdak baa kxawíia an baatcháatdeetak. Heehtaa baleilíiaakaxpisseesh “Baa ólichissaalah.” huuash bii chichéhchehchehkaalahkuuash ii baa kxawíia batbuúko kalapiiák an baa eétichisshe shíishiaahe ahúm bakák ammaa beewíawaassaawíish daache bii dútchihchewiak. ⁹Iísiko an bii bilaxpáakeesh baleilíiaakaxpisseesh an díawaawíish daachim ala shííosh baalaaxtalásshéen koottalée baa basshihtaátdeetak. Heehtaa bale baa íkuchkeesh ammaa ala sheé éwahchelak kalakoon baa ala kxawíia an díawee hilaa éwahkaak ii an baashé bashóocheelak. ¹⁰Haak baashé ko kala kootám éwahchek. Hinna baa íkuchkeesh ii an bilaxpáakiiwaakoochteesh bulutchilák baliachik. Heehtaa ko bale baa íkuchkeesh an díawaawíawee ii anmeéleetam éwahchem bale shéesh ko bíss kussaám éwahcheitchiwaak. ¹¹Kooták. Ko bale baa íkuchkim ítcheesh ii an baa ala kxawíianniawaawisshe ii bii kúak kalako ii baáshbihmaachim éwahchek. ¹²Hinna íwahkootahtaa baleilíiaakaxpisseesh baaxpáak bale baa íkuchkeesh ii íkuxxachia kúh kooták baaxpáak annawák baa kuxshík.

¹³Ko baam ítcheesh bale shéesh ak bíss óosh kussaak. Heétdeettaahilik. Baa ala kxawíianniawee ko ii kooták. Baa kxawíia ii baleilíiaakaxpisseesh ammaa ala shíío díawaassaawíawaak. Heem ammaa ala shíío ii bii sheekaalúum baa kxawíia ala koottáahile kúh ii éwahchek. Heem baa ala kxawíianniawaawissawaaliche bale shéesh ak bíss óosh koók. Kooták. Akbaatatdía bale baa íkuchkim díash díawaawíawaassaak baa ala kxawíiash ítchissaataahilim kannaa ii xíassaak.

Baa ala kxawíim baxúa awúualeesh kon bii hawasséek.

¹⁴Hinné éwahkuuk. Baleiláaxbaaxpee kon baleilíiaakaxpisseesh bilikkuúk. Heehtaa baa ala kxawíia baxúa awúualeesh kon bii hawasséek. Baa ala kxawíianniawaawissheesh ii bii is dáatchek.

¹⁵Baa ala kootéesh kuk díawaassaak. Baaleettaa baa an basítchiwaasseesh ko díawaak. Kooták. An bihchi bulutché baalaaxtéik. ¹⁶Ammaa an díawee iháatam éwahchekaashik. Ammaawasshihchéesh ii bii chichéhchehchet baleilíiaakaxpisseesh ítchim éwahchetaahileesh ii xíassaaik. ¹⁷Baa ala kxawíia ii díaweesh díawaawiawaalak ii kootássaak. Heehtaa ii díaweesh an baa ala kxawíianniawaawissheesh baxúá awúualam ii kooták. ¹⁸Baa ítche díawaawiawaahtaa anmeéleetak bihch awáakaawachissaak. Heem balasé awuuá baa ítchileetam éwahchek. ¹⁹Kooták. Baa ítche díawaawiawaalak anmeéleetak. Itchihk baa ala kxawíia díawaawiawaassaawehtaa ko díawaak. ²⁰Kooták. Baa iháatbaawiassaa kootáa díawaak. Baa ala kxawíia ii díaweesh díawaawiaweesh kussaak. Baaleettaa hinna bale baa kxawíim balasé awúualeesh kon bii díahcheik.

²¹Hinna an balee bilaxpáakeesh an balee ala kooté koók. Baa ítchiwaawiawaalak anmeéleetak. Baam baxúá awúualeesh kon bii baa hiléessaaik. ²²Baleilíiaakaxpissuum Akbaatatdía bilikkúuash ii baawihkammáachkaasak balasé ítchik. ²³Deéla bale iláaxihaam kúh it baxúá awúualak. Heem ammaawasshihchéesh iichúulaak baa iháate ko bii díahchek. An baa ala kxawíianniawaawissim baxúá it awúualeesh ii bii is dáatchek. ²⁴⁻²⁵Hinné an balee ala kooté koók. An baa basshihchéesh ii baleilíiaakaxpissuum Akbaatatdía bilikkúuash díawaawiawaataahilihtaa baa ala kxawíianniawaawissheesh ii bii is dáatchek. Tak balásitchissaawík. Sapéen bii kuxsák bii kuluschík he? hinna baa ala kxawíianniawaawissheesh koon. Baa ala kxawíia bii is dáatchessaak Akbaatatdía bii iháaxiiassaalak baliachik. Heelem Baxxiilaatúua Jesus Christ chúuss baa hilák Akbaatatdía balee kulustawilikkuualaachík. Ii Akbaatatdía kusseeé “Ahóoh.” baak.

Baleiláaxbaaxpee balee íassiiak balee hawassíawilikkuuk.

8 ¹⁻²Ischawúuan Dakkaasúua ammaa díawilikkuuash bahkaláttuuk. Heem Akbaatatdía balee annawíhkaak balee eéssaassaak balee sheekalíssaak. Íisko baa ala kxawíiaash kuhtát díawaawakaauk. Kalako ii Akbaatatdía ihch iháaxiiam baasúulak ko kala kooták. Heehtaa Baleiláaxbaaxpee kon

balee kulustakuuák hilaakée balee hawassíawilikkuuk. Heem Baleilaaxbaaxpee koóm ak ilíiak balee an bilaxpáaktaahile kuúm ko ii Christ Jesus balee hawátkaatak. Akbaatatdía chilassihchíssaak datchúshissaaihmaachik sapéeolahtaa Christ Jesus áxpak hawátkaatuulak sapéeolahtaa ammaa kxawíanniaissuuash ii ich is dáatchessuulak. Heehtaa itchiik Baleiláaxbaaxpee ko ichi hawasséehkuuk. ³ Akbaatatdía baleilíiaakaxpisseesh bilikkúuash awáakaawachissuum dáakbachee húuhkaawilikkuuak baa ala kxawíanniawuuash iháaxiawilikkuulak hiliachik. Dáakbacheesh bilaxpáakdaak húum bíilun ii Akbaatatdía baa chúuss déehchem saawilikkuúk. ⁴ Akbaatatdía íwahkootaawilikkuuak baleilíiaakaxpisseesh an balee ala koochéehchem annawéesh xaxúa díawuulak hiliachik. Ii kootéesh Baleiláaxbaaxpee an balee an díahche díawaak ammaa kxawíanniawaawissuuash díawaassuuk. ⁵ Bilaxpáakeem koóm daasawuuá ammaa isítche píisshe déelak an baa dassihchéesh kon hawasséihmaachik. Baleiláaxbaaxpee an díahcheesh díalak an baa dassihchéesh hawasséihmaachik. ⁶ Sapéeolahtaa Baleiláaxbaaxpee ichi hawasséehkuulak hilaakée ítche áahkuum an bilaxpáakuua ii baa koochihtíohmaachik. Heehtaa sapéeolahtaa ammaa kxawíanniaissuua ichi hawasséehkuulak Akbaatatdía kon ich iháaxiaihmaachim bale shéesh ii baa koochihtéesh ishóocheeluuk. ⁷ Kooták. Bilaxpáake ammaa kxawíanniaissuua kannaa ichi hawasséehkuut Akbaatatdía bale baa íkuchke díash kannaa iikukkússaailuk. Kooták. Díawioolak aliilúuleetiihmaachik. Haak Akbaatatdía iichúuluuk. ⁸ Kooták. Sapéeolahtaa ak ihkalátcheesh Akbaatatdía daasé ítcheewioolak aliilúuleetiihmaachik.

⁹ Heehtaa diiluk an daxáchiiliilush daache ammaa kxawíannialaalissalakaau díhchi chiweéhchewiassalah. Itchiik Akbaatatdía Iláaxbaaxpee daxúoo awúualam an daxáchiiliilush daache Baleiláaxbaaxpee díhchi chiweéhkaalah. Christ iláaxam húuhcheesh daxúoo awúualassalak dii eéssuuk. ¹⁰ Baa ala kxawíannialuuash kalako ii daxúoo shéehmaachihtaa Christ daxúoo awúuannak Akbaatatdía dii annawíhkuuk. Heem diláaxuua ii baa koochihták. ¹¹ Heem Akbaatatdía koóm Ischawúuan Dakkaasúua bale shée ak koon chiléhkaak ak kaka

bilaxpáakahcheesh Iláaxbaaxpeesh daxúoo datcheepím díiluh daxúoosh shéehmaachihtaa piishchiisaalak kaka dii bilaxpáakahcheihmaachik.

12-13 Heem bas bilaxpáakkaatuu “Ammaa kxawíanniialaalisuua ii an dii an bilaxpáakuua hawassáalaaliilush daachik.” ak heleetak. Heehtaa koótduulak Akbaatatdía dii ihchi koon iháaxiiam ii dáshdohmaachik. Heehtaa itchiik Baleiláaxbaaxpee an balee chiweé an balee bilaxpáakeesh ala kootíiish daacheesh koók. Baleiláaxbaaxpee ii baa ala kxawíanniialuua koómnaak kaka díalaassuulak an dii bilaxpáakuua ii baa koochihtíihmachik. 14 Akbaatatdía Iláaxbaaxpee bihchi hawasséewahkuulak Akbaatatdía dáakeesh bíiluk. 15 Koottáahilim ii éwahkuuash hinné koók. Hinna Akbaatatdía bale iláaxam dákuuash bale baailísshe dii is dáattuulak hiliacheesh kussaak. Itchiik Baleiláaxbaaxpee ii Akbaatatdía dáakeesh it díiluk. Heem “Abba Axée xuh Basaakáa” baawakáak balásaashbiawuulak anmúuwishik. 16 Baláaxuua hilfashiiook. “Akbaatatdía dáake bíiluk.” huum Akbaatatdía Iláaxbaaxpee hilíasheek. “Iwak koottáahilik.” 17 Heem dáakeesh bíilum ammaa baaláhkeesh bilikkuúihmaachik. Ischawúuan Dakkaasúua an baailíshe ammaa chúuss déesh bíiluh balee kootíihmaatak alasáashiiwaaxpeesh balee baaláhkahcheihmaachik. Akbaatatdía ammaa kulaakúuash bíiluh bulutchíwohmaachik.

alásáashiiwaaxpeesh balee baaláhkahchewiash

18 Hinné éwahchetaahilik. Alásáashiiwaaxpaam Akbaatatdía balee dútchihchewiash baa iíschisaaleettaahile ii hilaakée an baawilísuua bassihchíssaawiiilush daachik. 19 Baatách xaxúa Akbaatatdía ammaa an díash iíwaachíssaa óolitaahilik Akbaatatdía dáaktaahileesh sapéeolak éhchewiiook. 20-21 Akbaatatdía ammaa an díash xaxúa ammaa an díahchewiash aliilúuleetahchek. Ammaa an díash kuk koótdewiassuuhtaa an daáskooteesh koók. Baapéem Akbaatatdía koóm ammaa an díash xaxúa dússhipak kal ii dúuhpee xúhtassaaohmaachihtaa daasátchutak óoluulak hiliachik. Kalako ii daásittak baaihkammáatuush Akbaatatdía is bilaxpáake baa kxawíia ii is dáatchessuuash daásittuulak ko kala kootíihmaachik. Akbaatatdía íkaawiak ko baapé óolik. 22 Aa hilaakée ammaa an díash xaxúa it

baailísaak ii biláataaattuuk buh. Bía dáakbishbioot an baailísuuash ko kala kootúuk. ²³Hehtaa Akbaatatdía ammaa an díash biláataaattak kuttáchissuuk. Akbaatatdía an balee dáakeewiash bíiluh biiwaachíssaawóoluua aa an balee awááss daxchéesh balee kuluschíhmaachik. Baleiláaxbaaxpaam Akbaatatdía baa ítche bassée bilikkúuash balee axúa awúualahtaa kootáa bíilu biinmaxúoo baawiláatbaakaauk. ²⁴Akbaatatdía balee iléesh aa hilaakée ko alasaáashiiwaaxpee awákaawiawaak bulutchiwiáwaak awóonmakaauk. Hehtaa kal awákaawiawuulak anmúuwishdak sáapii awóoluuk. Kooták. Baa awóoluush kal awákuulak ii awóonmiilush daatdeetak. ²⁵Hehtaa ammaa al awákaassuuash biiwaachíssaak balasátchutbahkaak awóoluush koók.

²⁶Kúh baa éwahchewiawuulak anmúuleetam ii an bahchiwakáau balee alaaxtám Baleiláaxbaaxpee huuák balee kuxshíik. Iláhchisshe baatcháattaak ii iiaxúa baa bakáawilikkuuk. Iak bale ilíia hámneetak. ²⁷(Heht Baleiláaxbaaxpeesh koóm ak baa kalátcheesh chiwakáawilikkuuak Akbaatatdía daasalakootéesh Baleiláaxbaaxpeesh shiiawilikkuúk. Heem Akbaatatdía kuk bilaxpáake daasúuash ko íkaak ii Baleiláaxbaaxpeesh ammaa dassihché éhchek.)

²⁸Haak Akbaatatdía balee áxp baa hilím awáchissuum baa hawassíiak baatách xaxuatáhilia bach áppaa baa annawíhchewiak. Heem sáaptaa sáapdaht kalako ii baa al íttuum kootíohmaachim éwahkuuk. Ii kootáak ii balee chilakappéesh ammaa íkuchkuum díash kootáhcheihmaachik. ²⁹Baa kúshko kukaa Akbaatatdía balee éhkaak balee chilakappák dáakbachee ko balee kala kootdák hiliatak ko ii dáakbachee akúpe ahó héeleen bassáalak hiliachik. ³⁰Haak Akbaatatdía koóm dáakbachee ko balee kala kootdák hiliachik. Heem balee ilíik. Ammaa ilíia kúh baa annawíhchek. Ammaa balee annawíhche alasaáashiiwaaxpee kúh balee baaláhkahchek.

**Akbaatatdía dáakbachee bilikkuuák ii
an balee íchisshe balee óowiak.**

³¹Hinna íwahkoosheeweesh xaxúa ii xíassaawahchewiawaak Akbaatatdía balee óhchipchim balee ak iichúule balee ak axshéeleetak. ³²Akbaatatdía dáakbachee koóhtaa alíass dúuxaachissaak. Baaleettaa balee saawilikkuúhchek. Kooták.

Dáakbacheesh bilikkuúm baatách xaxúa kúh íiwishdeettaa áappaawilikkuuihmaachik. ³³Akbaatatdía iiaxúa is bilaxpáake ala chilakappéesh xaxúa annawíhchek. Sapéen balee baa aahiiláhtaa balee daaséen daachíssaaihmaachik. ³⁴Ischawúuan Dakkaasúua iiaxúa koóm Akbaatatdía kuss balee iláawilikkuuk. Kootáa kon saawilikkuúk. Heehtaa kaka chiléhchem Akbaatatdía ilapáko koon awáachik. Heem balee xawíhchewioolak baaleetak. ³⁵⁻³⁶Baawaalaáchim Baaxpéesh an baalaátuua awúuan hiláshiiok.

“Dís bilaxpáake bíilum ii baatatchée bale shéesh bíiskussuuk.

Iisaxpúatahchewishke dappeewíoosh ko balee kala kooták.” huuk.

Heehtaa sapéolahtaa xuh sáapdahtaa Christ an balee íchisshe koon balee iháaxiiawoolak baaleetiihmaachik. Baa an baalúua dak al íhch aliilúuleete dak baa baatcheeshé dak an baa díakxawiiio dak baa ilikákkaahiluaa dak al alíishe dak baaaxúassee xawáau dak baa ditchiláache dak bilitchilappíio hileen xaxúa aliilúuleettaahilihmaachik. ³⁷Heehtaa hinna iwahkoosheewaáheesh baa chúuss baáulahtaa Christ ak balee íchisshe koolássheen baatát bahchilakkaták baxsúuk. ³⁸⁻³⁹Baxxiilaatúua Ischawúuan Dakkaasúua ammaa an díawilikkuuash ii Akbaatatdía an balee íchissheesh balee éhchehchek. Deéla Christ an balee íchisshe ii haámneetak. Sapéelahtaa sáapdahtaa haawéewioolak alíinneettaahiliihmaachim éwahchekaashik bale shée dak bale bilaxpáake dak koó xuh bilaxpáakiaxpawisheesh dak baaaxualeetxawíishiishiaaheesh koó xuh hinna baapé baa ala sáapeesh koó xuh iisakkússee baa ala sáapeesh koó xuh Bilée Isée koó xuh baa batshúa koó xuh awáxe akchiisáa balee konnáht koó xuh bilannáawuukaashe binmuúkussahke balee konnáhtaa. Baatách xaxúa Akbaatatdía díash hinna an balee íchissheesh haawéewioolak baaleetiihmaachik. Iwak xaxúa éwahchekaashik.

Akbaatatdía dak is bilaxpáake Jews kootéesh chilakappéesh dak

9 Christ bii iikukkúm an baa ala sheewáawiaweesh kootúum bii bísshissaataahilik. Baleiláaxbaaxpee anmaawassihiché hawasséem an balíia koottáahiluum

bii éhchehchek. ²⁻³Bas bilaxpáake Jews kootéesh Christ kalátchessuum ii balásxawiikaashik. Kalako ii balasé an dashtaché baatcháacheesh ii koómneetak. Baaleetdak Christ ala kaláttuuwishbaalak kal ii kulustakuúolak hilínmaawakak Bilée Isée héeleen bihchi kuss shítbahkaak kalako ii Christ koon bii iháaxiik ii baa koochihtalák alíatdeetak. ⁴Akbaatatdía is bilaxpáakahkaak “balaaké” hehtaa alasáashiiwaaxpee íkaahchehtaa bale baa íkuchkitchishiishiaahuum áxpak díak baleilíiaakaxpisseesh kuúhtaa ala chiwakítaahiluaa ii báalilaak ákahchiia kuss ihchi baa ímmitee baatcháatchehtaa ⁵deéla Abraham dak Isaac dak Jacob dak is baaxaalfoo asíte koóuk. Haak Christ iiaxúa hinna awé áakeeleesh kúh ko hawáhtaa kootáa iíwiátak dúula kussiok. Akbaatatdía baatách xaxúa hawasséesh dáashe báaxxiio ii baa koochihtíoh. Ahóoh.

⁶Hinna íwahkoosheeweesh hinné koók. “Israelsh bas baaxaalfoo koók.” huuhtaa Akbaatatdía is bilaxpáake hám kussuuk. Heehtaa Akbaatatdía ii al ilíia an dússhishdeetak. ⁷Deéla Abraham koóm dáake ihée hámmishihtaa Akbaatatdía kon kuss hilíasheek. “Isaac kuttáche ichíssaaannee dáake an díss bihchi baa ímmitaaweesh koóohmaachik.” hek. Heem Abraham ichíssaaannee ham kuttáche Akbaatatdía is bilaxpáakeesh koóuk. ⁸⁻⁹Akbaatatdía Abraham kuss ihchi baa ímmiteeak hilíasheek. “Báalaa hawátdak bahchishíilak Sarahsh dáakbachee ko bishíihmaahchik.” Hinna íwahkooteesh Abraham ichíssaaannee ham kuttáche balasáasak “Akbaatatdía dáake” baawiiilush daachik. Itchihk Akbaatatdía ammaa ala shéesh kalako ii Abraham dáakbachee Isaac ichíssaaanneesh Akbaatatdía dáake kuttátuuk. ¹⁰Ko dáakbachee Isaac bas baaxaalíoo koók. Deéla Isaac uá Rebeccash dáakbachee dúupta iilápxuua koók. ¹¹⁻¹³Jacob dak Esaush dak it bishíssuuash it baam ítchi xuh xawíilak díooleettaa Akbaatatdía Rebeccash kuss hiliiasheek. “Hinna baa íáhe ishkawáashe baa isée koóihmaachik.” hek. Kúh Baawaalaáchim Baaxpéesh an baalaátuush awúuan hilíashiok.

“Jacob baa íáhe awáchishshik.

Heeht Esaush baa isée iíwiíwíátak balúule kussaáwaak.” huuk.

Akbaatatdía ii íwahkoosheesh Rebeccash dáakbachee hawátam chilakappéesh Akbaatatdía bale baa íkuchkam díash ko díahchewiak. Rebeccash dáakbachee ammaa an dioosh ko ii is biipiák koochéessaak kal ílaataalia koochéek. Heem Akbaatatdía daasalakooté koóm éwahkuuk.

¹⁴Hinna íwahkoosheeweesh Akbaatatdía koolíash baa bach kuxxáahcheleeta? Eek heétdeettaahilik. ¹⁵Ii kootásseesh Akbaatatdía Moses kuss hilíasheek buh.

“Sapéelahtaa balásdeeawakbiawaalak
baakuxshiwiáwaalak kootíihmaachik.”

¹⁶Bilaxpáakeem Akbaatatdía ihchi chilakappáhchewialak baa hilé baatcháattaak ichh annawéhchewialak baaleetiihmaachik. Heehtaa Akbaatatdía an daásdeesh ko óowiawialak hilaa kootíihmaachik. ¹⁷Baawaalaáchim Baaxpéesh awúuan Akbaatatdía Pharaohsh kuss hiliásheek buh. “Biiléen Egypt bilaxpáake dii is bacheeitchiwahkaak dii baa hawasséewahcheesh an bii baatcháachkaashe awé kootáa awóowiawiawaak bilaxpáakkootaa bii ala kooté éhkuulak baliachik.” ¹⁸Heem Akbaatatdía bilaxpáakeem daásdeewiak kuxshiwíalak koochéehmaachik. Deéla hawáteem kúh shíishtahchewialak kootíihmaachik.

Akbaatatdía an daaskawíia dak an baa daásdee dak

¹⁹Heem hinna iwahkoosheewaáheesh aaláa dii héeleen hawáteem bíss hilíasheeh. “Akbaatatdía ammaa an día hinné koóm daasalakooté díawaassaawiawuulak anmúuleetam iiléen balee koochéehcheim shóotaak ii Akbaatatdía baa an diawuua iháatahchek he?” ²⁰Bíilu balee bilaxpáakittakkaataatak Akbaatatdía iichúulewiawuulak baaleetiihmaachik. Hinna baatúukam hinna bacheé ak díash kuss hilíasheek. “Sáapíi bii hilíatdaa?” hewialak alínneetiihmaachik.

²¹Hinna bacheém baaté ak diash kon díam shóocheewialak kootíihmaachik. Hinna úuke ii baatéesh dúupdiawialak kootíihmaachik hawáte baapalisáalichit al ii díoo hawáte kuk baaptatchée al ii díoo. ²²Kúh Akbaatatdía bale baa kxawíihile al ii daaskxawíia óowiawiak bilaxpáake datchúshkaashbialak kootíihmaachim éhchehchewiahtaa ak daaskxawíihcheesh baa haawéish daachihtaa it daasátchutkuuwialak ii koochéessaaihmaachik. ²³Kooták. Akbaatatdía daasátchutak

ammaa an d'á an
baatcháache óowiawiak
iíschiisaa bilaxpáakuum
ákkuuwiiakuuash
daásdeekaasak iléewiak
Baaiiwaakoochihtéesh
koolúulak hiliachik.

²⁴Jews kootéesh dak ak
kootásseesh dak héeleen
kukaa bilaxpáakuum
hilíilak dáasaasak
íchissheesh bíiluk.

²⁵Akbaatatd'ía hilílasheem
ammaaihchiláakuuhchem
Hosea huuash baalaáchik.

“Bilaxpáakuum bii
beéssuuash hilaakée
balasáasak “bas
bilapáake”

baawihmaachik.

Bilaxpáakuum awáchississeesh hilaakée balasáasak
“bas awáchisse” baawihmaachik.” hek.

²⁶Ammashipúua baapshíishiaahe Akbaatatd'ía kuss hilílasheek.
“Bas bilaxpáake d'íi hawássuuk.” hehtaa hilaakée
“Akbaatatd'ía baa ii baa koochihtéesh is
bilaxpáake d'íiluk.” hek.

²⁷Haak Akbaatatd'ía ammaaihchiláakuuhche iháam Isaiah
huuash hiisáa iláak hilílasheek.

“Jews ahó ii biichiliakáate chimmíssuuash binnáaske
koolíluash ko kala kootúuhtaa kootáa
kooshtakáateem iléeihmaachik.

²⁸Akbaatatd'ía hinna awé áake bilaxpáakkootaa an baa
chilassihchiwíash shíassaihmaachik.” hek.

²⁹Isaiahsh kúh hilílasheek.

“Hinné kootíihmaachik.

Akbaatatd'ía baa iíschiisaaleeteesh baaleetdak
balee ichíssaaannee bilikkuússaalak balee
haawitáahiliihmaachik awaasúalahuum
Sodom dak Gomorrah dak ala kootúua.” hek.



Romans 9:21

Jews kootéesh dak Baleiichiweeítcheesh dak

³⁰Hinna íwahkoosheeweesh xaxúa Jews ak kootásseesh ihch annawéewiassuuhataa kalakoon Christ saakúuash kaláttaak Akbaatatdía ilíikalattuum annawíhchek.

³¹⁻³²Heehtaa hileen Jews kootéesh kuk Akbaatatdía bíassaak kootáa iléelak hiliatuuk. Itchihk báheelia ílaa ammaa an díoo al ítcheesh ihkaláttaak kootáa Akbaatatdía annawéelak hiliatuuk. Baleilíiaakaxpissee an díoo baatcháattaak ii ihch annawéewioohataa báheelia aliilúuleetak. Hinna bíim an daáu kooléesh alapíiak awé alakúkkuuwak áaahkuuk. Jesus ala shéesh ko bíash koók. ³³Baawaalaáchim Baaxpéesh awúuan an baalaátuush Akbaatatdía hilíasheek.

“Ikaalah. Awám Israel huum kúh Zion haak ii dáasaasuush koon Jews kootéesh héeleen bíim bulushíilak hawá ii awé alakkúkkuuwak ii ámnichiohmaachik.

Ko bíash iichúuluush koók.

Heehtaa ak kalátcheesh iixaxúa batchooléoleetak ihkulupíoleetiihmaachik.” huuk.

10 Bas bilaxpáakkaatu hilísh ammaa awóolitbako Akbaatatdía kuss an bahchiwakáak baatcháatbaak bas bilaxpáakkaate Jews kootéesh ilíhkaakuulak baliachik. ²Akbaatatdía baa hilakuuwíakaasak chilaschitáahinmioon éwahchetaahilik. Heehtaa an baa hilakúuash ala kootéesh alaaxtúua ii xíassaak. ³Akbaatatdía bilaxpáakeem an baa annawíhche éhkuuleetak. Itchihk ílaataahilia bale baa íkuchkim díak ii ihch annawéewiook. ⁴Christ ammaa an díawilikkuuash ii baleilíiaakaxpisseesh díawaawíilush daatdeetak Akbaatatdía kon balee annawíhchelak baliatuuk. Kooták. Akbaatatdía Christ ak kalátcheesh xaxúa annawíhcheihmaachik.

Christ biixaxúa balee iléewiak.

⁵Biiluk Jews kootéesh Baleilíiaakaxpisseesh ammaa ala shéesh xaxúa díawuuleetak. Moses baalaátak hilíasheek. “Sapéolahtaa Baleilíiaakaxpisseesh ammaa ala shéesh xaxúa díak Akbaatatdía ihch annawéehchewioolak kootáa iléehmaachik.” ⁶Heehtaa Christ ala kaláttuua

ko ii Akbaatatdía annawíhche Baawaalaáchim Baaxpéesh hilíashiiok buh. “Hilíasheelaassaalak koók. “Baaiiwaakoochihtéesh kuss hawátam báakuss dáak”” (Christ ammuúss oowíam ii Baleiichiweeítcheesh bíluss ammuúss oóhchewiak). ⁷Haak “Hilíasheelaassaalak koók. “Awushím ichéeshdeeteesh ak shée kooléesh kuss hawátam awuúss dáak”” (Ischawúuan Dakkaasúua kuluschiwíam ii Baleiichiweeítcheesh bíluss báakuss oóhchewiak). ⁸Christ íílaa awé kala kuss huuák balee iléewiak. Haak bale shéesh koon kala chilék. Kooták. Baleiichiweeítche ammaa ala sheetáahiluua hinné koók.

“Akbaatatdía al ílíia dáhkulaak élahkuum dalásuua awúualak.” huuk.

(Hinna al ílíash bik ko dii baachiweéiluk. Heem ko kaláttaalah.) ⁹⁻¹⁰Ko balee ílíash hinnéek. Akbaatatdía Jesus bale shée koon kaka chiléhchem balasúua awúuan éwahkuulak Akbaatatdía balee annawíhcheihmaachik. Haak baa héeleen baláak “Baxxiilaatúuash koók.” buulak Akbaatatdía balee ílíawilikkuuihmaachik. ¹¹⁻¹²Jews kootéesh dak ak kootásseesh dak xaxúia kan bach kala kootúuk. Heem Baawaalaáchim Baaxpéesh Christ ii iláak hilíashiiok.

“Sapéolahtaa kaláttuulak daasúua xawíissaaohmaatak ammaa ilusshítuuleetiihmaachik.” huuk.

Heem ak kalátche xaxúia Axxiilaatúua koók. Ak kuss chiwakáak ak bakíia xaxúia baa áatchelakaashihcheihmaachik. ¹³Akbaatatdía ammaaihchiláakuuhchem Joel huuash baalaátak hilíasheek. “Sapéolahtaa Baxxiilaatúuash dáasaasuulak kulustakuúihmachik.”

¹⁴⁻¹⁵Baawaalaáchim Baaxpéesh kúh hilíashiiok. “Itchiwík. Akbaatatdía baam chúuss ílíash duúot baa héeleen iláak Baleiichiweeítcheesh al ítche ii iichiweéiluk.” huuk. Heehtaa Akbaatatdía baa déhchessaalak sapéen chiwaakuúk he? Haak Baleiichiweeítcheesh ak chiweéleedak shóotaak Baxxiilaatúuash al ílíia iikukkúuk he? Iikukkúuleedak shóotaak kaláttuuk he? Kalátchessuulak shóotaak dáasaasak iléelak hiliatuuk he? ¹⁶Heehtaa Akbaatatdía kon bilaxpáake héelass déhkaakuuhtaa kooshtakáattaahilim Baleiichiweeítcheesh iikukkák ahkúxittuuk. Isaiahsh iiaxuataáhile bakáak hilíasheek. “Akbaatatdíakaataa kootdák

an baláaush sapéeo ak balee kalátche?” ¹⁷Heem Christ is baaaliichiwiéesh ii iichiwaáush ii Jews ak kootásseesh Baleiichiweéitcheesh iikukkáahkuuk. Hinna Akbaatatdía al ilíia iikukkúuash ii Christ kaláttuuk.

¹⁸Heem koottáahilik. Jews kootéesh Christ ala kootéesh iikukkúuk. Kooták. Baawaalaáchim Baaxpéesh hilíashiiok.

“Al iláaush awé kootáataahilia híik. Kooták.

Ammaa ala shiíosh baa ala híileettaahile híik.” huuk.

¹⁹Kúh Israel kuhtée bilaxpáake Baleiichiweéitcheesh éhchekaashtaahiluuk. Heehta ammaa ala shiío díawiassuuk. Kushko Moses iiaxúa koochihk ak hilíashee koók.

“Jews ak kootásseesh ak ílala ihchi bilaxpáakahchesseesh kóoush dii baa óolitbahchewihmaachik.

Jews ak kootásseesh baa éhkuuleeteesh ii dii daaskawíwaawihmaachik.” hek.

²⁰Haak Isaiahsh baailíssaachissaa baa ala koottáahile baa chiwaák hilíasheek.

“Ak hilaakée bii chichíilisseehaa bii óolapiohmaachik.

Ak hilaakée bii íkaawiassuuhaa bihchi kuss awóowiawihmaachik.” hek.

²¹Heehta Akbaatatdía Isaiahsh ihchiláakuuhchem Israel bilaxpáake ii iláak hilíasheek.

“Baa baapbishéet bilaxpáakuum an balíia díassaak bii iichúulum kootáa awóonmaalitak sápbahchewiawaak.” hek.

Kalachii Akbaatatdía Jews daásdeekuuihmaachik.

11 Ikaalah. Biiwaxúa Israelite bii kooták. Abraham is ílannee bíik. Benjamin ashammaléaxxiia ko bii hawák. An bii daáshtataatuuleetak. “Akbaatatdía ham balee iíwiátassaak is bilaxpáake Jews bíilum.” baak Heétdeettaahilik. ²Baawaalaáchim Baaxpéesh ammaa ala shéesh élahchekaashtaahiluuk. Elijah huuash Akbaatatdía bakáak Israel bilaxpáake dúpiahchewiak. Heehta baa baapiískotaahilia Akbaatatdía is bilaxpáake koóhchek. Heem iíwiátassaak iíwiátdeetihmaachik. ³Elijahsh hilíasheek. “Akbaatatdíakaataa ammaalíhchilalaldahcheesh hawéese xaxúa dappiíok. Ak dii kalátcheesh bittáchkaatxpik. Kootáa bíh bii dappeewíook. Haak díis baaiihulishoopbaaxpéesh

dasheeshéetaak baa haawíiok.” hem ⁴heehtaa bakálee díak hilíasheek. “Díttachissaak. Bacheé pilakisáa pilaké sáhpualichim koolák ak akbaatatdíalitdele Baal huuash kuss ishúushpattak chiwakíissuuk.” hek. ⁵Baa baapiísko ala kooté hilaakée it kooták Akbaatatdía baa daásdeekaasheesh kalako ii Jews kootúum Akbaatatdía chilakappéesh bii kooshtakáataxpuuk. ⁶Akian bachéesh ammaa hilúua ko ii Akbaatatdía chilakappíssaak. Heehtaa íltaa ammaa daásdeekaasheesh ko ii chilakappík. Baaleetdak bilaxpáake an baa hilúuash ko ii chilakappilák ammaa daásdee kootássaaihmaachik. Heehtaa ammaa an díawuuash ko ii Akbaatatdía daásdeekuulak ammaa daásdee kussaak. Heehtaa baa daásdeelak ammaa hilúuash kussaak.

⁷Heem Israel bilaxpáake al ahó iiwaachíssaak ammaa chichíilakaau óolapíssuuk. Akbaatatdía ala chilakappéesh kooshtakáateesh óolapuuk. Hawéese shíishtak baa iikukkúuleetak. ⁸Baawaalaáchim Baaxpéesh an baalaátuaa hilíashiok.

“Istúuwishihtaa baa íkaassuuk.

Ahkúxuuwishihtaa baa iikukkússuuk.

Akbaatatdía an baa dasshihtúua dak daasúua dak kulusshíim baaleete dak baa ala kooté dak kal ii baa dasshihchikaáshbioolak baaleetak.

Hinna baapé it kootúuk.”

⁹David kúh ii ilíik. Hilíasheek.

“Hilísh ammaa isítchiiosh ko ii Akbaatatdía ihch alíinneettaak óochiahcheih.

Awushéem awuúss xapíoh. Datchúshiih.

¹⁰Istúua téexiak baa íkaassaaoh.

Kootáa baa alaaxtíhmaachik.

Heelak ii baa chúuss déeoh.

Heelak kalako ii baatách xaxúa ii baailísaakaaohmaachik.” hek.

Jews ak kootásseesh ham iléehmaachik.

¹¹Heem Jews kootéesh baa ala kxawíannioohtaa ihchichéhkaak ishtatáachisshiohmaachik. Christ iiwíátuuash kalako ii Akbaatatdía Jews ak kootásseesh ahúm ko ilíiak Jews óolichihchewiak. ¹²Jews ak baa kalátcheleetak Christ

iiwiátuuash kalako ii Jews ak kootásseesh baa áatchiluua baatcháachik. Heehtaa Jews kootúum iléewiash xaxúa atúulak kuk ammaa áatchiluuash iíschiisaataahiliihmachik.

¹³Hilaakée Jews ak kootásseesh díin díiluss balíwiawaak. Bacheeiixpíluupeesh bii hawám Jews ak kootásseesh díiluss bii déehchek. Haak Akbaatatdía ko ammaa bii díahche ii kuss “Ahóoh.” baak. ¹⁴⁻¹⁵Akbaatatdía bas bilaxpáakkaate Jews iiwiáteesh kalako ii bilaxpáake hawéeseesh xaxúa Akbaatatdía ak is koochíiash kulussáak is bilaxpáakahkaak hilísh bas bilaxpáakkaate Jews óolitdak hiliatam aaláa ihkulupáoh. Hilísh Akbaatatdía bii chúuss baa hilák hám iléehmachik. Kúh Christ kaláttuulak ii Akbaatatdía baa annawíhchelak kalakoon ii ak shéem chilaák kaka bilaxpáakdak ko kala koottáahiliihmachik. ¹⁶Jews biiluk baaxawuaóoshe páshkuwassee baaxpáawahkaak Akbaatatdía bakúiluk. Kootáa ko baaxawúash koochihtáa Akbaatatdía ishóochissaawaak kuss “Ahóoh.” buuk. Haak kúh balapáaleem ichíhchishhiia ítchilak alaakaashúuash kúh xaxúa kootúuk. Kúh Abraham dak Akbaatatdía ammaaihchiláakuuhcheesh dak is bilaxpáake koóum baapéem ichíssaaneeo kúh kootíohmachik.

¹⁷Balám baáchuushipitkaate koon apáliiluash awám Israel huuash dak Jews kootéesh ii baa xíassaak. Heehtaa Akbaatatdía alaakaashúua ham páshkak bitáaxiiak. Haak kalakoon alaakaashúum iháam shóoshuuwia apáaleesh koon axúahchek. Heem balám shóoshuuwia apáaleesh alaakaashúuash ko kan dii kala kooták hilaakée balám apáliiiosh ichíhchishhiia koon bilaxxée Jews ak kootásseesh diiluk dii baa duushíhkuuk. ¹⁸Heem dii baa áatchiluuash Jews kootéesh koóum ii kooták. Heem dilíiwaaiseessalah. Hileen alaakaashúum Jews ak baa kalátcheleeteesh ii baa xíasseesh Akbaatatdía iiwiátak pásshusheesh diiluk ii ak baatcháataatdelessalah. Díiluh dii alaakaashúum ichíhchishhiia baa duúshdahchessuuk. Heehtaa ichíhchishhiia kon dii baa duushíhkuuk. Kalaaxtássaalah. ¹⁹Heehtaa dilíiwaaiseessaak hilíshheessalah. “Heehtaa akian alaakaashúua dápasshusak bíilun an balee ala koolé díalaawialaak.” ²⁰Hinné kooták. Christ kalátchewiassuuash kalako ii pásshusak iiwiátak. Heehtaa diiluk dánhkalattuuash kuttácheesh kalako ii hinna baléesh

átduuk. Heehtaa baa íáleetaatdelessaa dalásiseessaalah. ²¹Akbaatatdía Jews kootéesh alaakaashúutaahileesh chilaschíssaak. Heem an dáhkalattuua koómnuulak “Balee chilaschíihmaachik.” dilíachissaaalah. ²²Ikaalah. Akbaatatdía an baa daásdeekaasheesh kootáa an baa datchúshkaasheesh kalaaxtássaalah. Jews kootúum baa kxawíihiluush ii datchúshik. Hawéechiisaa diiluk Jews ak kootásseesh dáhkalattaalakaaulak an dii daásdeesh ii baa koochihtíihmaachik. Heehtaa koótdaassuulak díiluh dii pásshushiihmaachik. ²³Akbaatatdía Jews kootéesh ala koolúuush kaka chilaksakshiwíalal kootíihmaachik. Heem ala kalátchessuua koowíiolak kúh kaka koochéetaahiliihmaachik. ²⁴Aaleéla Jews ak kootássuum ak baa kalátcheesh alaakaashúum shóoshiwia íilaa apáaluush ko dii kala kootúuhtaa hilaakée Akbaatatdía is bilaxpáake kan dii atúuk. Jews kootéesh alaakaashúum pásshushheesh ko kala kootúuhtaa Akbaatatdía hileen alaakaashúua kulutták kuhchisséewialak baalúussaaihmaachik.

Akbaatatdía bilaxpáakkootaa daásdeekaashkuuk.

²⁵Bakúpkaateen hinné ala koottáahile élahkuulak “Akbaatatdía an baa íkuchke éwahchekaasuuk.” dilíachissaaalah. Heem hinna ala koottáahile xálichihtaa hilaakée dii éhchewahchewiawuuk. Israel bilaxpáakeesh baa kaláttuuleetkaassaaohmaachik. Jews ak kootássuum iléewiash baapéem Akbaatatdía kuss duúolak Jews kan hila baa kalátcheohmaachik. ²⁶Heelak Akbaatatdía Israel bilaxpáake xaxúia iléeihmaachik. Baawaalaáchim Baaxpéesh ammaa ala shíifosh hílfashiik.

“Akbaailéesh awám Zion huuash koon Jews kootéesh héeleen ko kukaa húuihmaachik.

Heelak Jacob ichíssaanneesh an batshúalituush haawíiak xaxúia annawíhchem baa ilutchíitchissaaohmaachik.

²⁷Kooták. Shóon baa ala kxawíiannioosh bitáaxiwaawakbiawaalak bale baa íkuchkitcheem hila awáxpak díawaawihmaachik.” huuk.

Kooták. Akbaatatdía Jews kooté iléeihmaachik. ²⁸⁻²⁹Heehtaa hilaakée Jews kootéesh Baleiichiweeítcheesh iwiátuum

Akbaatatdía is koochíihchek. Kalako ii diiluk Jews ak kootásseesh dii baa áatchiluuk. Heehtaa Akbaatatdía daáskulusshiissaak sapéelak chilakappilák baa ítcheesh kuúihmaachik. Akbaatatdía is baaxaalíoo kuss al ihchi baa ímmiteesh kalako ii Jews kootéesh is bilaxpáakahcheesh it íchisshim ii kooták. ³⁰⁻³² Akbaatatdía an baa páchkiishe ko ii bilaxpáakkootaa Jews kootéesh dak ak kootásseesh dak al ilíia díassaailuk. Ii kootéesh xaxúa an daásdeekaashe óowiawiak. Heem Jews ak kootásseesh diiluk baapanmasshipúua Akbaatatdía al ilíia díalaassuuk. Heehtaa Jews kootéesh kúh al ilíia díassuuk. Heem hilaakée Akbaatatdía an dii daásdeekaasuush dilúttuuk. Kooták. Hilaakée Jews kootéesh al ilíia díassuuk. Kalako ii baapéem Akbaatatdía an dii daásdeekaasuush kúh kaka kootáakuuihmaachik.

Akbaatatdía dáashe báaxxiwaawook.

³³ Akbaatatdía baatách xaxúa éhchek. Daasalakooté ak éhcheleetak. Baa an día kúh ak éhcheleetak. Baa íischiisaaleeteesh dak an baatcháacheesh dak an dahíssee dak bahchiláshik. ³⁴ Baawaalaáchim Baaxpéesh an baalaátuuash hiláshiiok.

“Akbaatatdía ammaa dassihché ak éhcheleetak.

Baa chiwaakuuwóolak aliilúuleettaahiliohmaachik.

³⁵ Akbaatatdía baa an dákbialuua kal íischiisaa dákuuk.

Heem ii kaka baam íiwishdiaish daatdeetak.” huuk.

³⁶ Kooták. Baatách xaxuatáahilia iiléen díak xalússhikaalaatak kalako ii annawitáhiliik kúh ak aaláalaweesh koók. Haak baatách xaxúa ko chikittaakuukaásuulak baliachik. Bilaxpáakkootaa dáashe an báaxxiia ii baa koochihtíih. Ahóoh.

Akchiwakíim annawitáhileesh hilíatak.

12 Hinna íwahkoosheeweesh xaxúa Akbaatatdía an balee daásdeekaashe baatcháachim bakúpkaateen ii dii baawakáauk. An dii bilaxpáakuuash Akbaatatdía kuuák koochihtíiaaláh. Heelak koótduulak dii annawíiak isítcheehmaachik. Iwak kal an bahchiwakíwiilush daache koók. ² Hinna awé áakeen bilaxpáakeesh an bilaxpáakuua píisse deéssalah. Heehtaa baaleettaa dalásuua dak ammaa

dáasshihtuua kulussáalah. Heelak Akbaatatdía an dii bilaxpáakuua díhch an dilúttuua kulussáalakuohmaachik. Heelak Akbaatatdía ammaa dii díahkuuash dak an baa ítche dak an baa isítchee dak an dii bilaxpáakuuash al annawitáahinnuua élahchelohmaachik.

³Akbaatatdía bacheeiiaxpíluupeesh bii hawáhkaak hinna an bii baaláhke bakóosh ii dii baánmalaauash ii íkuxxache díiluss hilíashewaaak. “Bii baatcháachik.” dílíachissalah. Haak díhchi báaxxiilaassaaliilush daachik. Itchihk bilaxpáaktaahinnaalah. Christ an dáhkalattuua ii Akbaatatdía bale baa eétitcheesh dákuuash élahchekaashdohmaachik.

⁴Balee axúa baa shíishiaahe ahák baatcháachik. Haak ala xatáaush shíishiaahuuk. ⁵Kúh bii ahúhtaa akchiwakíia biiluk balee bilaxpáakhawatak bale axúa hawátdak ko kala kooták. Heehtaa an baa díawuua shíishiaahik. Akbaatatdía bale baa eétitcheesh bilikkúuash hawátdak baatcháachissaak

xaxúa bach kuxxúuk. ⁶Akbaatatdía ii íkuxxache bale baa eétitchim ii balee díahcheesh ii is bilaxpáake bahkuxsúulak hiliachik. Heem ammaa dii díahkuua díaalah. Hinna íwahkootesh Akbaatatdía dii ihchiláalakuhchelak

díilíal an baa dáhkalattuush ii dialaaliilush daachik.

⁷Dii baa kuxshíhkuulak baa ala kúuwe kuuáalah. Dii baachimmíhchehkuulak al ilíia ii baachimmílahcheliilush daachik. ⁸Dii baa baáliliihkuulak díalaaliilush daachik.

Dii baa kuxshíhkuulak díataahilak baa baa íluuaalah. Dii bacheeítchihkuulak díhkuualassalah. Dii baa daásdeehkuulak díak ii dalásittaalah.

⁹An baa aláchissuua díataahilak baa kúassalah. Baa kxawíash kuk dúupiak déhkaalah. Akbaatatdía baa al ítchihcheesh díhchi kuss daxchitáahilaalah. ¹⁰Bale

baa íchissheesh ala koottáhile ko ii díaalah. Haak bat chikitcheekaásaalah. ¹¹Deéla díishihtassaa baa hilikaásaalah. Akbaatatdía ko baa díalaalakuuash dalásuua díak akúkussahkeesh aaliíalah. ¹²Akbaatatdía ammaa kulusáawilikkuuash dílíatdak dalásuuash xawíhchessalah. Baam ihaakkéelitdaht baakoon káalah. Haak kúkkan

chiwakáakaalah. ¹³Akchiwakíilakupuuash ham baa kúuwuulak kuxsáalah. Baa iháaulahtaa kootáa dílíachissaa ólaachissaa kussák baa duushíhkaak óotchia alaxapúua díakuuaalah.

14 Akbaatatdía bakáak hileen ak dii baailíshehcheleesh baa al ítche ko kuss kaalakuuáalah. Baa ala kxawíash kuk baaleetak. 15 Baaihkammáatuulak díiluh áxpak baalíhkammaataalah. Haak íwuulahtaa díiluh áxpak díiwaalah. 16 Bilaxpáake xaxúa daásdeek bach kuxxáhkaalah. Díiluttat ak íttaatdelessaalah. Bale baa hiléem ii díhch asíitahchewiassaalah. Itchihk dii baa íaleetassaa cheeshdáa baa hilák áaahkaalah. Haak éhkoon ak baa éhchekaasaatdelessaalah. 17 Deéla bilaxpáakeem baa kxawíiam díiluss díoolak bakálee diiluk koochéessaalah. Bilaxpáake xaxúa baa al ítchihkuuash díawiaalah. 18 Kúkkán kala sáapdialaalaht baawishkáa bilaxpáake áxpak ítche áaahkaalah. 19 Biilápaachawachissheen Baawaalaáchim Baaxpéesh hilíashiiok. “Ak baa kxawíash bíilaa bakáleesh díawaawiik.” hek Akbaatatdía.” Hinna íwahkootesh díilaa baa bakánniawiassaalah. Akbaatatdía ko díahkaalah. 20 Itchihk Baawaalaáchim Baaxpéesh ammaa ala shííosh díaalaa. “Dís kootáaush alíisuulak eekuúalah. Iiwakatuulak bilishíihkaalah. Iwahkootduulak biláaxahcheem issheeleem dápaaxuulak ko kala kooták.” Kooták. An dii an díakxawiiosh ii baa ilutchíittak baailusshítak áaahkuohmaachik. 21 Baa ala kxawíash díhch ipúahchessaalah. Itchihk baa al ítcheesh ii diiléen dípualah.

Akchiwakíia baleilíiaakaxpisseesh díalaaliilush daachik.

13 Akbaatatdía hileen bacheéítche xaxúa kon pátchiik. Heem ii koolúua koók. Koon dúushiia shóohkeewialaht díaihmaachik. Biixaxúa bacheéítcheesh ammaa íkuchkuua díawuulak koók. 2 Hinna íwahkootesh sapéelahtaa bacheéítchim iichúulelak Akbaatatdía ammaa páchkiishe ko iichúulek. Ak koochéewishdak ko bacheéítcheesh ishóoche aaliiohmaachik. Iilaa ihchi díak. 3 Sapéelaht ammaa an día ítcheelak an baa chilíileetak. Heehataa ammaa an díash kxawíialak kuk ihchi baa aahíihmaachik. Baa al ítche díaluuash kalako ii hinna bacheéítcheesh dii al iláaulakoosh ítcheehmaachim ammaa dachílaauleetak. 4 An baa hilé ítcheelak ii Akbaatatdía ko baa hilakuulák ko kala kooták diin dii díalakuuk. Heehataa hinné kalaaxtássaalah. Dii datchúshbioolak ko díaihmaachik.

Heem baa ala kxawíash ko díaluulak dachíliiliilush daachik. Akbaatatdía ishkawáashe koóm ak baa kxawíihileesh Akbaatatdía kon baa datchúshihchek. ⁵Hinna íwahkootesh hinna bacheéítcheesh al ilíia díalah. Dalásawuuan an díalaaliish daache koóm élahkuum koótduulak iiwaaláassihche ítchiihmaachik. Heehtaa koótdaassuulak dii datchúshiohmaachik. ⁶Haak shóon hinna bacheéítcheesh an baa hilé ítcheelak Akbaatatdía ko baa hilakuuák baa annawéelak hiliachik. Kal ii íwahkootesh kúh díxaxua baakakíiwishdialuuash biipé hawák. ⁷Baa an dákdiilush daache kuuáalah. Bálee ii baakakíiwishe shíishiaahe díalah. Hileen bacheéítche xaxúa chikittaák bilaxpáakashteehkaalah.

Bach íchissalah.

⁸Dís baa íiwishdeetuaa íiwishdialaalakaaliilush daachihtaa bale baa íchisse kuk íiwishdeetam ii díakaalah. Sapéelaht baa íchissilak baleilíiaakaxpisseesh ammaa ala shííosh kan díak. ⁹Hileen bale baa íkuchke xaxúa díalah. “Bach kataalúua díassaah. Bilitchilappéessaah. Baa ataalíssaah. Baa óolichissaah.” Hileén dak hawéese xaxúa bach aaliíak hawátkaatduulak hinné koók. “An díhch aláchissheesh aláxpíilasshiia kúh kootáakuuh.” huuk. ¹⁰Sapéelaht áxpíishiiia íchissilak iáxxohchessaak. Aláxpíishiiia al aláchissuuash ii baleilíiaakaxpissheesh xaxúa díalaataahinnohmaachik. Bale baa íchissheesh baleilíiaakaxpisseesh kal ichéeshkussahkeesh koók.

Hinné díalaalohmaache biiwílaalik.

¹¹Hinna íwahkootesh awé ammaa ala kooté élahkuum Christ ala chishíiwiash kala saskáatam élahkuum kan díttaak díhchichehkaalah. An bahkaláttuuwassee ko baapé baa ala kxawíia koon balee ala kulustakuuwíash it shíak. Heehtaa hilaakée kala saskáatak. ¹²Hinna óotchiash kúh itta uhpé híilaam baapéesh kúh kala húuk. Kooták. Hinna awám kxawíash koon an balee bilaxpáake kala itta uhpé híilaak. Baa ala kxawíia ala chihpashé kooléesh kala koómmuulak koók. Chíisbishe it balee dichíssaa it baappaá balee dusshúuataaliche ii díawuulak koók. ¹³An bihch an buluttúua annámmuulak bilaxpáakuum ala saashiiash kooléesh ko

kan balee kala kooták. Koótbawiiilush daachik. Hileén baa issheeák káaxxuhtaak kootáa baa iluchíttuuleetak baa ilushíttuuleetak bat bulúuak bach ilíftaak baa óolitak kootéesh díassaalah. ¹⁴Itchiik Baxxiilaatúuash Jesus Christ díhchi koosáhtakaattaakalah. Ammaa kxawíanniialaalissalakaauush koochéessaak al ii koótdaawialuua díassaalah.

Akchiwakíilakupeesh chilasshihtakaássaalah.

14 Hawátuum an baa kaláttuua kooshtakáatuum baa ikuchkishiishiaahe al ii ihchi baailíshehkuuash iwiátassaak sapíhkaalah. Heehaa an díailush daache ii áxpak baa aashtáchissalah. ²Bilaxpáakuum an baa kaláttuua ii sáapdaht duusúulak alátdeetak. Heehaa baa iháaum daásduupak alatshíia baa al apáale kuttát duusúuk. ³Hawátuum bale baa duushé shóoteeht duusúuash ak koochéesseesh awássaahchessalah. Kúh hawátuum sáapdaht duusúuash Akbaatatdía kon alátdeetahchem ak ilúkdushisseesh chilasshihchíssuulak koók. ⁴Bacheé ihéem ishkaáashe chilasshihchiwíassalah. Axxiilaaché ishóocheen iluú xuh xapdáhtaa Baxxiilaatúuash iluúhchewialak kootíihmaachik. Akbaatatdía bilaxpáake sáapduusuulahtaa annawíhcheihmaachik.

⁵Bilaxpáakuum an baa dasshihtúua “Akbaatatdía al íkee baapúum itchikaasák hawéese kootássuuk.” hiliatuuk. Baa iháaum kúh baapé xaxúa bach kala kootúuk. Bílaa ammaa basshihtúua al ítche ko díawaawiiilush daachik. ⁶Hinna íwahkooteesh bilaxpáakuum baapéet kuttách ítchikaashihkaak ko ii Baxxiilaatúuash chikitchewíook. Hawátuum ko baapé ítchikaashihchessuum ko ii Akbaatatdía chikitchéessuuk. Ammaa duusúuash ii Akbaatatdía kusseeé “Ahóoh.” huut ko ii Akbaatatdía chikitchéeiluk hawátuum bale baa duushé shóoteeht duusúuash dak hawátuum bale baa duusúum ak duushbíasseesh. Hileen baa an duushé dilúsuu xuh dilúshissuulak shóokaalaht xawíissaak alíftuuleetak. Hileen an baa dáhkalattuu shóokaalaht xawíissaak alíftuuleetak.

⁷Bílaa bihchi bilaxpáakbahchessuuk. Kúh bílaa bale shée díawaassuuk. ⁸⁻⁹An balee bilaxpáakeesh Baxxiilaatúuash kootíiawaawakuuk. Deéla baasúulahtaa Baxxiilaatúuash ala

kootáhche koók. Christ saák kaka chilaák bilaxpáake xaxúa Axxiilaatúua koolák hiliachik ak bilaxpáakeesh dak ak shéesh dak. Heem it balee bilaxpáaka xuh baasúulak Baxxiilaatúuash it balee baaláhkak.

¹⁰ Koottáahilik. Biixaxúa Akbaatatdía al awáache ishóoche bíwohmaachik. Heelak koon balee chilassihchíihmaachik. Diiluk baa íkuchkishiishiaahe dáhkallattuash bilaxpáakuum díasseesh chilassihchíssaalah. Haak diiluk ko baa íkuchkeesh dáhkallatchessuuash bilaxpáakuum díash kúh awássaahchessaalah. ¹¹ Baawaaláachim Baaxpéesh an baalaátuuash hilíashiiok.

“Dís Akbaatatdíoó bíik.

Ammaa ala sheewée koottáahiluuk.

“Akbaatatdía díik.” haak bashóocheen ishúushpattak bíi chiwakíiohmaachik bilaxpáaktatchiia.” huuk.

¹² Hinna íwahkoteesh kalako ii biixaxúa sáapdiawuulak dak sáapii koótbuulak Akbaatatdía baachiweéwohmaachik buh.

Dakúpuua iháass aaléessaalah.

¹³ Heem bat chilasshihtáahkussaalah. Itchihk hilaakée daláse díak dakúpe kuss baa iháatchessaalah. Koótdaaalahkuulak aaláa ámmítak baa ala kxawíia kuhchishíioh. ¹⁴ Baxxiilaatúua Jesus balee hawátkaateesh kalako ii bale baa duushé xaxúa baa ashítdeetam éwahchetaahilik. Hawátuum kúh bale baa duushé ham ii baa ashíchim haak kaláttuulak kusséesh kala kxawíik. ¹⁵ Bale baa duushé ham ii akchiwakíilakupeesh iáxxolahkuulak kusséesh bale baa íchissheesh kal ii díalaassuuk. Dalátaawuuash ii baa iáxxohchessaalah. Aaláa ii baa kxawíihilak iháass déeoh. Kúh Christ kon saakuúk. ¹⁶ Heehta aaláa ammaa díaluua ham annawúum élahkuulahtaa ak baa kalátcheleetuum baa kxawíichiilak akchiwakíiash ko chilassihchiwiáakaak ii ilíikxawíiakaauk. Sáapdialuulak díhch íassíiaalah.

¹⁷ Akbaatatdía an bacheeítcheesh sáapdilusak sáapishdiilak kuk dassihchíssaak. Itchihk Akbaatatdía an balee an díahche kan díaalah. Haak Baleiláaxbaaxpeesh baa annawéesh dak al ítche áalahkuuash dak deéla bale baaihkammáacheesh an bilikkuuwíash koók. ¹⁸ Heelak an dii ala kootúuash kalako ii Akbaatatdía dii isítchiiom hawéese kúh dii chikittúuk.

¹⁹Hinna íwahkootesh hileen akchiwakiiwakupuuash awáxpak ítche áawahkuuwiawaawiiilush daatak an baa bahkaláttuua kannaa bat bahkuxshíwiiilush daachik. ²⁰Bale baa duushé ham dilúsuaa ii ak baa kalátcheem an baa kaláttuua baa haámnaalak duushíssaalah. Bale baa dúushé xaxúa alátuuleetahtaa baam dilúsuulak kalako ii baa ihéem ii baa kxawíannialak ammaa dilúshe duushíssaalah. ²¹Ílúkdilushi xuh baáchuuwilaxxee ishdíi xuh baa sáapaacheem díaluulak hileen akchiwakíilakupeesh ii ihchi kxawíailush daatdak baa iháattaak baa kxawíihiluulak koochéessaalah. ²²Baa íwahkootesh ii sáapdahkalattuulak diilaxúa dak Akbaatatdía dak díiluttach éhkaalah. Bilaxpáakeem baa an día “Annawík.” hilíatdak kalako ii baa ilushíchissaak ii daásitchikaashik. ²³Sáapeem díaluulak bale baa kalátche koolássaalak baa kxawíannialuulak ko kala kooták. Bale baa duushéesh díluulak annamnák ii dalásduupdak an baa dáhkalattuua koolássaam Akbaatatdía dii eéssaaohmaachik.

Baa ihée chilastáalah diiluk baaleetak.

15 ¹⁻³Hinna íwahkootesh Christ hinna awé kuss húua ii ihchi daásitchihchewiassaak. Itchihk Akbaatatdía ko daásitcheewiak. Baawaalaáchim Baaxpéesh hilíashiio dáhchichelahchek buh. “Bilaxpáake dii íwaaxak huuhtaa ala koottáhileesh bii bii íwaaxuuk.” huuk. Hinna íwahkootesh hawátuum balee héeleen an baa kaláttuua baatchaatáauk. Heem ak kootásseesh bahkuxshíwiiilush daachik. Hawátuum bale baa íkuchke shíishiaahe ak kalátcheesh aliípdeetbahchewook. Bíluttachkaak ammaa ii balee daásitche kuttát bahchichíilissaawook. Itchihk akchiwakiiwakupuuash ko bahkuxsák ko daásitchiwaawiiilush daatak bilaxpaaktaahiláaum ammaa kaláttuuash kannaa áxpihcheohmaachik. ⁴(Baapammasshipúuash Baawaalaáchim Baaxpéesh awúuan ammaa baalaátuuash ii baa éwahkaak deéla ammaa ala shíiosh ii balasátchutak an baluúo chichúchik. Kalako ii an baa bíáwuuwishik.) ⁵Akbaatatdía balee daasátchuchihkaak an baluúo chichúttaak hilísh Christ Jesus píisse itshannéetaa daláak ii bach ilílahkalattaak dii

koowáteeak kalako ii ítche áalahkuuk. ⁶Kúmmaam dáaptuua hawátdak ko kala kooták Baxxiilaatúua Jesus Christ Iilápxe Akbaatatdía dáashe díixaxua báaxxiiluulak baliachik.

**Jews ak kootásseesh Baleiichiweeítcheesh
kúh kal iikukkúuk.**

⁷Christ dii ii biátassaam díluh bach iíwiátassalah. Koótduulak bilaxpáake an dii íkuua Christ ala kooté dii kooták Akbaatatdía dáashe báaxxiiaohmaachik. ⁸Christ biiluk Jews ammaa an díawilikkuuash kalaaxtássaalah. Ii koochéesh Akbaatatdía baa ala sheé díait ko ii baa xíassaahchewiak. Iwak díak Akbaatatdía Abraham dak Isaac dak Jacob dak ala kuss ihchi baa ímmiteesh kootáhchewiak. ⁹Haak kúh Jews ak kootásseesh Akbaatatdía an daásdeekaasheesh ii dáashe báaxxiiak kuss “Ahóoh.” huuk. Baawaalaáchim Baaxpéesh awúuan ammaa baalaátuuash David Akbaatatdía kuss baláxak hilásheek.

“Hileen Jews ak kootásseesh héeleenmaalak díss hilásheewaak.

“Akbaatatdía díik.” baawiik.

Haak iichiwakáauwuua ii daláshe báaxxiwaawihmaachik.” haak

¹⁰kúh iháahte

“Jews ak kootásseesh baalíhkammaataalah. Akbaatatdía is bilaxpáake áxpak baalíhkamaataalah.” haak

¹¹kúh iháahte

“Jews ak kootásseesh díixaxua Akbaatatdía dáashe báaxxiiaalah.

Bilaxpáake díixaxua dáashe báaxxiiaalah.”

¹²Kúh Isaiah huuash koóm Akhuuwíash Awóonmakaauush ii hinné baalaáchik.

“Jesse huaa ichíssaanee héeleen hawátam huuwíak.

Jews ak kootásseesh is bacheeíttuuash koóihmaachik.

Heem ammaa bíoosh koóihmaachik.” hek.

¹³Hilísh Akbaatatdía ammaa biáwuush ammaa

bahkaláttuuash kalako ii dalásitchishtak bach

ilílahkalatchelohmaachik. Baleiláaxbaaxpee an baatcháache ii Akbaatatdía an baa biáluua kannaa áxpihkaalah.

Paulsh an baalaáche is biipé hinné koók.

14 Bakúpkaateen díiluh baatách xaxúá élahcheliilush daache kal élahkuum biiwaxúá bíh éwahchetaahilik. Kúh bat baánniliitichilaawialuulak kootíihmaachik. Dínnaxuoo baa dalásdeekaasuum bíh éwahchetaahilik.

15 Heehata ammaa balaácheesh awúuan hám bakúpkaatuu dii bahchilastaachíssaak baa shíishiaahe dii chichéhchewahchewiawuuk. Ii kootéesh Akbaatatdía bii dáasaasak Christ Jesus bii baa hilakuúhchewiak Jews ak kootásseesh Baleiichiweeítcheesh bii chiweéhchek.

16 Akbaatatdía is Baleiichiweeítcheesh an baachiwéesh ii ammaa an díaweesh akchiwakíwacheeitché an baa hilúuash ko kan bii kala kooták. Heem Baleiláaxbaaxpee Jews ak kootásseesh annawíhchelak baliacheesh kalako ii Akbaatatdía ko kuúohmaachim isítcheehmaachik.

17 Hinna íwahkoooteesh Christ Jesus balee hawátkaatam Akbaatatdía an baa díawaawakoosh basítchiwaak. 18 Christ an bii chúuss baa hiléesh kuttách baa bahchilastaachíssaa ii baláak ammaa ala sheewéesh dak ammaa an díaweesh dak kalako ii Jews ak kootásseesh Akbaatatdía ammaa an díahcheesh díoolak baliachik. 19 Heem Akbaatatdía ii bii baa hilák áalammaahiluum an baatcháache ii díash dak Baleiláaxbaaxpee kúh an baatcháacheesh dak ii hawass baaláweesh Jerusalem kalakoon aa awám Illyricum huuash dáaskeesh kootáa hinna Christ is baaaliichiweeítcheesh baatách xaxuatáhilia shóoleeht dakkátbaak. 20 Baa ihéem an baa baachimmíhche áakeen baa áxpiwahchewiawaassaa biiwaachíssaak baa díawaak baatcháatbaak hinna baleiichiweeítcheesh bilaxpáakuum Christ it ii iikukkúuleeteesh baachiweewiáwaak. 21 Baawaaláachim Baaxpéesh hilfashiiok.

“Bilaxpáakuum ii kuss áxp iichiwaáuleeteesh dak iikukkúuleeteesh dak shóon ala koottáhile iikukkúulak éhcheohmaachik.” huuk.

Paulsh Rome kuss déewiak.

22 Hinna íwahkoooteesh puuchíta díiluss boowiáwaawehtaa bípbisak anmeéleetiik. 23 Heehata hilaakée hilihtée ammaa

díawaawiawee kan biháalak báalee sáawaacheem díiluss boowíawaak anmeéleetak ²⁴Heem hilaakée kala koótbaawiik. Awám Spain huuash kuss baaléewiawaak awóochiak dii awákaawiawuuk. Dii awáxpak koon baalítéelitak kan baaléewiawaalak bii dáhkuxshilak baliachik. ²⁵⁻²⁷Heehtaa Macedonia dak Achaia kuhtée akchiwakíia daashístaak bálee dúttak Jerusalem kuhtée akchiwakíicheeshkaate ii kuxshiwíook. Iilaa daáskootak díoohtaa kootáa Jerusalem kuhtée Akbaatatdía is bilaxpáake kuxshíilush daachík. Jews kootéesh baleiichiweeítcheesh ak kootásseesh kuss aaluúok buh. Heem kúh Akbaatatdía ammaa ala kúuash ham ii Jews ak kootásseesh hileen Jews kootéesh kuxshíilush daachik. Heem it boossáa koochihk Jerusalem kuss baaléewiawaak Akbaatatdía is bilaxpáake ak kooléesh ko bálaaum ii kuxshiwíoo ko aawaaléewiawaak. ²⁸Iwak biháalak hileen bálee an dúttuuash xaxúa bahkukdák kalakoon Spain kuss baaléelak hilaa dís ashbínmaanmiik. ²⁹Eehkuhtee baalák Christ is baleiichiweeítche koon baa ítche ahóom díiluss aawoówihmaachik.

³⁰Bakúpkaateen bale baa íchishshim Akbaatatdía Iláaxpaaxpee bilikkúuash dak Baxxiilaatúuash Jesus Christ dáashe ii díawaak dii baawakáak bii áxpak Akbaatatdía kusseé chiwakáawakkaasaalah. ³¹Akbaatatdía bii íasseelak hileen akchiwakíissee Judea kooléesh bii díaxwiiassuulak Akbaatatdía is bilaxpáake Jerusalem kooléesh an bahkuxshiwiáweesh kootdák ii daásittuulak ii chiwakáawakkaalah. ³²Akbaatatdía daasalakootéesh koolák díiluss boówihmaachik. Kalako ii hilaa balásittak bihchissák bach awáxpak baawihkammáatbuuk. ³³Hilísh Akbaatatdía an dii bilaxpáakuua itche dii dahkúhkuuash díixaxua dii áxpak koolíih. Akbaatatdía kootáhkaalakuulak bahchiwakáak kusseé “Ahóoh.” baak.

Paulsh bilaxpáakuum kuss “Shóotaachi?” hek.

16 Bakúpuua Phoebe huaa Cenchreae kuhtée akchiwakíialaxuache is bacheeíttuaa hawám bale baa íchishe ko bíash áappaa díiluss déewahchek. ²Baxxiilaatúuash ko is bilaxpáakam bilaxpáakashteehkaalah. Akbaatatdía is bilaxpáake ala kootúua koók. Bii dak

bilaxpáake iahúum ak balee kuxshé koók. Heem chiikúss baa ala kúummishdak kuxsáalah.

³Díixaxua dííluss “Shóotaachi?” baahtaa hilaakée hinné baawalaátak ii dii héeluaan hám dii balasáashbiawuuk.

Priscillash huuash dak Aquilash huuash dak “Shóotaachi?” baak. Bii áxpak Christ Jesus baa hilakuúk buh.

⁴An bilaxpáakuua ihchi baatcheesshíiak bii kuluschiwíook. Kusseé “Ahóoh.” baak. Heehtaa bittáchissaak Jews ak kootássuum akchiwakíiash xaxúa kúh kootúuk.

⁵Haak akchiwakíialaxuahcheesh aasúuo kooléesh kusseé “Shóotaachi?” baak. Kúh biilápaachkaate Epaenetus huua kúh kusseé “Shóotaachi?” baak. Haak Asia kuhtée Christ ak kalátchewassaakaasheesh koók.

⁶Kúh Marysh kusseé “Shóotaachi?” baak. Baa hinnákuua baatcháatcheik.

⁷Kúh Andronicus dak Juníash bas bilaxpáake hawúum kusseé “Shóotaachi?” baak. Bii áxpak anmaalaxtúuashe ishkawúualuuk. Hileen bacheeiiaxpíluupeesh hileen bacheé dúupta ammaa iisaléhchekaasuuk. Bii íischiisaa kukaa akchiwakáauk.

⁸Ampliatús kúh kusseé “Shóotaachi?” baak. Baxxiilaatúuash kon baaláhkam bii biilápaachkaatak.

⁹Urbanus kúh balee áxpak Christ baa hilakúuash dak biilápaachkaate Stachys dúupta kusseé “Shóotaachi?” baak.

¹⁰Kúh Apelles huua kusseé “Shóotaachi?” baak. Baa chúuss déekaashe dakkaták Christ ala kaláttaalaacheesh xíassaahchek. Aristobulus huua dak aasúuishkawuuash kúh kusseé “Shóotaachi?” baak.

¹¹Kúh Herodion bas bilaxpáake hawám kúh kusseé “Shóotaachi?” baak. Baxxiilaatúuash ak kaláttuum Narcissus huua aasúuishkawuua koolúuash kúh kusseé “Shóotaachi?” baak.

¹²Tryphaenash dak Tryphosash dak biilápaachkaate Persis Baxxiilaatúuash baa hilakuuák baatcháattuash kúh kusseé “Shóotaachi?” baak.

¹³Rufus Baxxiilaatúuash an baa hilakuúm asíiteesh dak isahké bii dáake ko kala koótcheesh dúupta kúh kusseé “Shóotaachi?” baak.

¹⁴Asyncritus dak Phlegon dak Hermes dak Patrobas dak Hermas dak akchiwakáaum áxpak chiwakáaush kúh kusseé “Shóotaachi?” baak.

¹⁵Philologus dak Juliash dak Nereus dak akúpbiakalishte dak Olympas dak Akbaatatdía is bilaxpáake xaxúa áxpak chiwakáaush kúh kusseé “Shóotaachi?” baak.

¹⁶Háwattan bach alákuulak “Shóotaachi?” haak bach baa iháahchessaalah. Hilihtée akchiwakíialaxuacheshiishiaahe xaxúa díiluss “Shóotaachi?” huuk.

Paulsh an baa baáliliia ii háakeesh

¹⁷⁻¹⁸Biilápaachkaateen dii baawakáauk. Díhch íassiaalah. Bilaxpáakuum dii bach ilíichihchewioosh dii baa bachílapeehchewioosh baa iháass aaléewioosh an dii baachimmíhkuuwasseesh ko iichúuluuk. Ko bilaxpáakeesh Baxxiilaatúua Christ baa hilakuússaak. Itchihk ílaa daasalakootúua kuttách ko díawiook. Ilíiehkaak ilíiitchikaatak ii bilaxpáakuum baa al attáleetaachkaateesh kúailuk. Kooxiíssaalah. ¹⁹Baleiichiweéitcheesh ammaa ala shífo díaluum akchiwakíia shóoleht éhkuuk. Ii balásittak baawihkammáachik. Ak baa éhcheleetdessaa kalako ii baa ítche ko díalaak baa kxawíia kooxdíssaalohmaachik. ²⁰Ko bilaxpáake kooxdíssuulak Akbaatatdía Chíisbishe kala shíassaa an baatcháache haawéelak díś daátmaalohmaachik. Heelak an dii bilaxpáakuua itche dii dahkúhcheohmaachik. Baxxiilaatúuash Jesus Christ dii baa áatchinnaachihcheoh.

²¹Timothysh bii áxp baa hiléesh kúh díiluss “Shóotaachi?” hek. Haak Lucius dak Jason dak Sosipater dak bas bilaxpáake hawúum kúh kootúuk.

²²Tertius huaa bíik. Paulsh is ak baalaáchkuuash bíik. Heem bíh bii akchiwakíim díiluss “Shóotaachi?” bíh baak.

²³Gaius díiluss “Shóotaachi?” hek. Akchiwakíialaxuahcheesh aasúua koon chiwakíiiluk. Haak Paul bíim bíh hileén baalichíik. Erastus hinna awaasúualaho

is akbálaakulaau koóm dak akchiwakíiwakupuua Quartus díiluss “Shóotaachi?” huuk. ²⁴Baxxiilaatúuash Jesus Christ díixaxua dii daásdeeakuuh. Kootáhkaawilikkuuih.

Paulsh hinna ala chiwakíia ii iháalik.

²⁵Shóon Baxxiilaatúuash Jesus Christ is baleiichiweém ítcheesh ii balíit hilíashewaaik. “Akbaatatdía an baa dáhkalattuuu kannaa áxpíhchewialak kootíihmaachik.” Iwak baleiichiweém ítcheesh koottáahilim Akbaatatdía baauh pawassáako xíakaattaak dúushiihtaa ²⁶hilaakée kan baa ala koottáahileesh aaiikuschík. Akbaatatdía ammaaihchiláakuuhcheesh Christ al ii baalaátuuash Akbaatatdía balee chiweetaahiláak “Baa chiwáalah.” hem koótbuuk. Baa ii baa koochihtéesh Jews ak kootásseesh alakuluushíishiaahe xaxúa kaláttuulak kalako ii ammaa an díahche díoolak hiliachik. Iwak díawuuu ii al ilíia koottáahileesh ko ii kaláttuuk. ²⁷Jesus Christ ammaa an díash kalako ii hilísh bilaxpáakkootaa Akbaatatdía kuttáchkaateesh baatách xaxuatáhilia éhkaalacheesh dáashe báaxxiio ii baa koochihtíih. Ahóoh.